



天津交通銀行同人俱樂部圖書室

左文襄公書牘卷十七

起光緒二年丙子七月訖十二月

目錄

答沈吉田

與金和甫

與吳清卿太史

答譚文卿

與劉克庵

與豫錫之大臣

答張朗齋

與劉克庵

書牘卷十七目錄

上總理各國事務衙門

與譚文卿

與張朗齋

答劉毅齋

答劉克庵

答袁筱塢

與譚文卿

答劉克庵

與劉毅齋

與胡雪巖



與劉克庵

答張朗齋

答明鏡泉大臣

答劉克庵太僕

答江西巡撫劉仲良中丞

答豫錫之大臣

與鮑華潭中丞

答劉克庵

與劉毅齋

答金和甫

答曾沅浦

答金和甫

答劉克庵

與劉毅齋

與豫錫之大臣

上總理各國事務衙門

答陳俊臣

答劉克庵

與張朗齋

答晉撫曾沅浦宮保

與劉毅齋

與善厚齋將軍

答劉蔭渠

與劉克庵

與崇峻峰方伯

答劉毅齋

答曾沅浦

答譚文卿

答蘇撫吳子健中丞

與安饒峰孝廉

與沈吉田

答劉克庵

與王蓴農

答張朗齋

答劉克庵

與張朗齋

答胡雪巖

與劉克庵

答劉克庵

答劉毅齋

與胡雪巖

與沈吉田

答劉克庵

上總理各國事務衙門

與劉克庵

答劉蔭渠

與金和甫

答譚文卿

答劉毅齋

上總理各國事務衙門

書牘卷十七目錄

與劉克庵

與劉毅齋

與劉克庵

上總理各國事務衙門

與伊犁將軍金和甫

答楊石泉中丞

答浙江提督黃芴巖

與王若農

與湖廣總督李小泉制軍

與劉克庵

答李仲雲觀察

答楊石泉

答劉毅齋

書牘卷十七目錄

五

答沈吉田

丙子

今歲關隴豐熟惟熱氣不可當弟營對雪山惟峰頭尙籠絮帽餘皆銷化潤我禾黍歲事之豐以此不但甘霖也聞蘭州西安患暵相同此聞日午亦復難耐哈密尤甚出塞之師已抵阜康狡賊先踞縣城以抗顏行後隊糧運取齊乃可促戰計日閒已開仗矣餉事樽節敷衍冀可少延清歡惟借洋款必俟雪巖信到乃可定計緣雪巖書曾言花旗布洛斯秋冬閒始有鉅款到滬也看來今冬明春仍非向華商議借不可前信所以要將各借款趁早還清者以此大軍已進阜康距賊巢不遠一百五十餘里阜康以後之糧自可就近採辦古濟一帶亦可採辦價腳并算較之遠道勞費可省一半見已分飭各局矣其歸包甯夏採運可漸漸樽節以便騰出見銀發前敵採辦祈將撥歸包甯夏銀兩綜算已有若干約穀買五百萬斤實到巴里坤即可緩發銀兩如前敵戰事順利則腴疆糧食可供各軍無須遠道採運矣高明當以爲然

與金和甫

書牘卷十七

一

吉副都統事昨奉 廷旨始悉已經參奏并見摺稿弟以此公舉動離奇若操之太蹙恐別出事端致成話柄原疏所陳自係正論而過於激切於事體似屬非宜況彼此所爭重在公義稍涉私忿難以折服其心弟處應畱一活路俾有可轉之機然後事體正大而情理兩盡 朝廷亦易於處置也日閒當據實上陳歲事豐稔

採購自易尊處如何籌畫希早爲之所錫子猷已否西行尊處飭
徐學功歸其統帶頗有言子猷與徐不相融洽者然否

與吳清卿太史

劉瑞齋到營得展惠賤并拜魚筍席布之賜俾荒服勞人得嘗江
鄉異味而暑蒸不耐得享清涼之福眠食勝常感荷何似瑞齋質
樸耐勞暫畱營中俾資練習異時必有所成出塞諸軍六月中旬
已抵阜康糧運無誤戰事當在秋節之前安集延酋有助逆抗拒
之說果爾則悉力北路移師南向不致久勞耳此處與布魯特同
爲邊界強鄰道光閒張格爾之變卽爲所指喉近更交土耳其鬻
泰西利器以自雄泰西亦陰庇之同治四年入踞南八城北與俄
人比勢殊驕甚非痛創不能弭其釁也適檢舊匣見閣下屬書賀
復齋數紙乘涼風乍起爲書七贊一幅外一聯寄上餘尙未暇乞
轉付之

答譚文卿

蘭州餉差到奉糟魚茶骰變蛋之賜每日小盤一餐與幕客共之
不復知其身在遠塞也感謝何似此閒異味惟野鹿黃羊然固不
可多得豚魚雖同內地然內地豢而邊塞芻肉味不如魚則游泳
雪水之中性寒骨硬刺口有餘果腹未足且春夏水發則生冰堅
則化無徑四寸者東坡謂所得不償勞此則勞而無所得也惟番
羊易得價賤於豬軍中多買食焉今觀茲珍品固宜不負斯腹而

蹴蔬亦無譏耳筠庵學使書來力以振興文教自任邊方寒峻幸有師資方伯開單商推約一任可得二萬四千有奇陋邦荒儉殊甚每用慙媿典試雙旌計已度隴暑氣猶熾長途跋涉極可念也方伯代臨試事一切幸有成式可遵當期無誤歲事之豐關隴塞外居然一律糧價雖未甚平減而運費節省良多誠時局之幸前見寄克庵書言英夷桀驁情狀變而加厲未知到滬後有何舉動如有所聞希隨時示悉得蔭渠制府書知馬嘉理案似尙無更動威脅之意本不在此也

與劉克庵

鄧光榮回具述尊意令其便道訪察州縣差徭之弊開呈一單閱

書牘卷十七

三

所呈似尙確實請遴委委員逐一覆查以剔積弊省西州縣各缺腴瘠不同軍興皆以供億爲苦臺里車藉資民力亦有由津貼以均苦樂如果地方官吏實力奉行則民累減而官事辦何至復有怨咨無如甘涼一道未得其人一任各屬欺朦互相容隱以致實惠不能下究甚且於弟所發差價及客軍差價亦均隱匿侵吞恬不爲怪良用慨然愚見俟尊處委查完畢後卽催鐵道履新由涼而甘遂加履驗然後擇尤撤換以示懲勸庶可漸覩實效高明以爲然否劉福堂於署缺一事敢與尊處齟齬驕傲無禮竟至於此殊堪惱恨已飛檄飭之若輩器小易盈又復不識大體恐非其福得和甫六月廿一日來書知進駐阜康後修城造倉見因阜康縣

至黑溝戈壁數十里無水泉供汲飲已會商湘軍於有水處開渠導流以供軍聞賊之精銳悉聚古牧地此間得數大仗則烏垣紅廟可圖矣計此時已有戰事毅齋尙無詳信來然觀和甫所鈔摺稿則固毅齋囊底之智耳秋熱甚烈惟葆衛不宣

與豫錫之大臣

十六磅十二磅子洋礮已據鄂臺起解弟已飭蘭州軍裝局到卽分解奉還尊處想必不誤我軍進至阜康猛攻古牧地賊不北竄卽將南趨朗齋扼哈密弟於安西敦煌亦有布署而玉門之庫克托羅及青頭山亦均派兵駐紮斷其竄大通西甯之路則海藏自可相庇以安前承寄示輿圖眉目瞭然與新疆識略互相表裏深得

書牘卷十七

四

得其助佩謝茲有啟者敝軍馬隊皆取材北口弟意更求番馬以助之茲遣差弁賓恩曜前赴西甯揀選駿馬數十騎來肅操練一試其能伏希飭各番目知照遇有官人採購須擇其尤者應客勿以下駟爲要購馬應需若干請先爲墊給弟隨飭蘭州支應處如數奉解也

答張朗齋

接七月二日惠函於俄商赴哈銷貨一事處置甚好佩慰之至毅齋前月廿一日阜康來信言及阜康西二十里西樹兒頭以西五十里皆戈壁中惟甘泉廢堡有井泉僅供百人汲飲若從此攻古牧地實爲不便查古牧地附近黃田地方有水可駐多營賊已對

柵守護擬於是夜率大隊銜枚疾進務期攻拔此處以便接攻古
牧地未知已得手否稟中并稱據該處難民稱安集延已派人助
逆日前官軍馬隊巡哨見有背洋槍賊騎裝束異眾大約卽是安
集延酋派來助逆之隊尊處有所聞否并乞隨時示知

與劉克庵

七月十六日得毅齋捷報十八日卽六百里馳報仰慰 聖懷和
甫尙無隻字見及或已單銜具奏耶此次連復數城北竄自可無
慮安集延潛遣助逆就便創之惜來賊無多也烏垣紅廟十餘年
不霑 聖化善後非人不辦土回桀黠首與逆謀者必誅餘可不
問叛將叛卒能及早反正者亦當赦之餘則頭緒紛如尙不知如

書牘卷十七

五

何說起新復一處地方卽添一處經費正愁無米爲炊偏添不速
之客如何如何黃楊兩將解餉至暫畱營中此閒需用雖繁然承
解各批尙有餘存者此後得兩批半卽可勉強支拄蓋糧運二者
尙可力求撙節也

上總理各國事務衙門

七月初三日接奉鈞函祇領壹是俄人近注意互市一事其要由
哈密覓通藏路徑當是預爲將來互市地方起見渠以關外卽哈
密境不知中間尙隔安西玉門敦煌也察看俄人無他詭謀惟利
心太重將來互市必費唇舌然尙通情理當可商量還是要處置
得宜要能自強耳俄糧續到古城者一批由西湖至沙灣者一大

批共一百卅餘萬斤此後無再到者見值麥豆登場市價平減無需其代爲採運俄商販貨來巴哈銷售者曉以正用兵之際恐有不虞致滋事端旋亦自去俄兵并無駐紮沙山子之說見惟古城有護糧兵四十名尙未去耳古牧地烏垣紅廟均已克復昌吉賊已到烏城同烏城賊竄走南路據活賊供瑪納斯賊白逆臨竄時已約其翻山南竄尙未知其確否如果北路肅清俄人當復理互市之事屆時當與詳商也別牋所示謹一一登復論者謂徐學功久未領餉由於和甫之刻查該營餉章有無多寡宗棠無從查悉聞其營本是團練與兵勇異人則或多或少時聚時散其餉亦無定數也和甫所部自出關以後多冗雜之患從前宗棠與之商酌

書牘卷十七

六

精選十餘營近已增至廿餘營究不得力而餉源大絀卽按月點綴亦覺維艱軍情漸渙實亦由此謂其待徐學功獨薄似未必然瑪納斯之敗欲輕額爾慶額之罪不得不責重徐學功但摘翎頂尙未爲過至欲遣散該營之說則無所聞且該營本無定數亦無所謂遣散也孔才之赴泐山由其自請非遠之之意該營并無分屬他部之說亦不能分吉爾洪額吉江六起餉本充裕因向來營員販運私貨展轉營私致有攤銷勒扣騷擾臺站之弊和甫接統景部移交但有私貨而無見銀且沿途有截去協餉四批之說和甫曾以此怨裕厚恨之刺骨并怪秋屏之漫不加察也景營舊部分餉之少事或有之由於專餉早空新餉一到卽盡之故非有意

從薄和甫軍營委員太多得力者少所信用之託雲布與同類不協聲名甚劣宗棠有所聞而未得其詳和甫爲人和平寬緩陰柔寡斷工於伺便取巧恥過文非有時失於激切處置不合致生事端卽如桂斌吉爾洪額兩人情性乖張糊塗謬妄假令措置得宜早爲善遣亦復何能爲患而桂斌則必欲置之死地吉爾洪額則必斥爲亂臣賊子之倡使其無機可轉人而不仁疾之已甚遂至紛紜如此良可慨也至六起馬隊不乏可用之才馬隊護運放探較步隊爲易古城至大石頭色畢口不過四百餘里奏摺所稱巴古中開一帶卽指此而言由巴里坤至古城八百數十里大石頭色畢口距古近距巴遠以六起防之豈不綽有餘裕見在徐占彪

書牘卷十七

七

以不足五營馬步由巴里坤分紮至大石頭且過色畢口而謂千餘馬隊不敷分紮以此爲勞耶宗棠自駐肅以來從未見吉江馬隊防運一次分紮一起所謂不容休息實欲加之罪耳愚意竊以西事延至今日不辦固壞愈辦愈壞實由人才不出無可如何見在北路局勢日寬需才日急而眼前足當一面不染軍營惡習者實無其人不得已而思其次亦不多見每一思及憂悚殊深金和甫庸中佼佼尙或可與有爲若冀其另開生面能自樹立竊虞其不逮此外如富珠哩之樸訥能戰本所深知然望其大有作爲亦難深許只盼錫綸堪以造就否所有烏魯木齊各旂缺及伊犁南八城人材伏祈廣爲延訪早爲儲備誠大局之幸榮署將軍英參

贊不能駕馭俄人好與計較小處俄人亦內輕之每與尋衅似久任非其所宜也伏希鑒察

與譚文卿

六月廿一夜至廿八日連克堅城陝甘客回本處土回及安集延部均已擊敗白逆潛遁吐魯番毅齋之功偉矣金和甫咨報未到弟祇得據毅齋各稟入告仰慰 聖懷原摺先鈔送覽可知其詳矣士氣方盛可乘勝攻取南路惟北路新復各城須安民設官置兵儲糧爲固守計然後下兵南路方有根本和甫才短心伎諸事不肯商量恐未能一力承當妥爲經理西事之難由於人才太乏每一思及殊深憂悚

書牘卷十七

八

與張朗齋

得毅齋六月廿九日兩稟知黃田得手後卽攻古牧地拔之壘逆關逆城逆鮮得脫者乘勝克復烏垣紅廟兩城陝甘各回土回及安集延回就戮者多白逆南竄昌吉呼圖壁瑪納斯各踞逆亦斷不能穩踞戎機順利良爲快慰惟未接和甫咨報未能會奏想已單銜馳陳弟亦於十八日將大概情形具奏矣賊蹤既竄吐魯番哈密固當衝要然有雄師扼駐總要賊來亦有以待之惟巴古中間八百餘里徐崑山馬步五營由巴延紫至大石頭三箇泉已屬鞭長莫及其三箇泉至古城一帶三百數十里應由和甫派紫者未聞其布置之詳崑山言其單薄弟曾疊次函牘頻催和甫無一

字見復殊爲可慮賊既到吐魯番則古城奇臺木壘河等處皆爲衝要和甫不肯增隊防勦白逆慣於乘虛抄後心竊危之尊意如果賊向東北竄走擬於所部內分支截擊深佩公忠然防地太寬難以抽撥若明鏡泉能選派馬步兩三營前往擇要扼紮則大妙矣兄盍爲我言之如承其慨允弟再補咨可耳劉鳳清見紮何處并請示知再哈密本通吐魯番大道聞交界之處地勢平行逶迤并無險隘可資扼守似應深溝固壘嚴防衝突凡紮營各處宜多掘梅花形式之陷馬坑錯落布置彼此聯絡以助其險趁此秋高氣爽地未凝冰之際工力易施幸試爲之軍火子藥槍礮事事宜寬爲籌備弟力所能辦者必竭力應之將來從此出兵芻粟水泉

書牘卷十七

九

須預爲籌計庶免臨事周章也

答劉毅齋

接閱尊處兩捷報兩覆堅巢兩下堅城摧朽拉枯莫喻其易軍威之盛近無倫比拊髀稱快遐爾攸同安集延分兵助逆本在意中惜前來就戮者不多耳白逆每給人拒敵敗則先逃此次南竄未知仍踞吐魯番抑西竄以就安夷此賊不誅終爲邊患和甫久無咨報來營自己單銜馳報實任烏魯木齊都統克復城垣天顏有喜可知矣十數年羶歲之場今始掃除淨盡并助逆外夷亦識天威此後辦理順易固有必然然非將新復之區一一經畫周妥可守可戰務期久遠則亦未可恃以爲安想和甫當有籌策白逆

既封安集延其無北竄之意早定此次向吐魯番竄去并呼瑪納斯踞逆同竄或欲以安集延爲去路固未可知安集延距喀什噶爾不過千里從前道光六年張格爾之變引安集延爲心腹收其部卒爲親兵敗後匿入安集延官軍屢向索取不應後乃令黑帽回子誘擒之白逆如師張逆故智遁匿安集延望其縛獻完案恐不可得惟俄人能於伊犁出兵截其歸路庶可收夾擊之功且屆時再說目前所慮者由吐魯番竄東北巴古中間一帶耳巴里坤至大石頭一帶有徐軍分紮秦玉盛三起馬隊紮三箇泉此外只金軍馬隊洪姓帶百餘騎紮木壘河其東城堡奇臺縣至古城均未見一人一騎分紮弟於六月初二日有函牘致和甫七月初二

書牘卷十七

十一

日又有公文催之迄無一字見復不解何故如白逆到吐魯番探無官兵駐紮豈不生心假使此閒稍有差錯大局又被其攪動矣見復咨催未知其肯垂採納否麾下如能分馬步三營速往古城池東奇臺東城堡木壘河駐紮與徐軍聯絡一氣則局勢穩固可無他虞將來進兵南路卽飭紮奇臺東城堡木壘河各營同徐崑山一軍各由防所前進聲勢似更壯也希卽照辦爲要

答劉克庵

廿一日接奉十一日惠函劉簡青路過巴燕戎查點宗岳勇數想可得其大概范秉誠戰事非優初意人尙明白能聯絡人又隨從日久尙知卹民爲重不料其利心過重如此送子歸家便寄萬金

之說是否實有其事尤易明白也副白旂馬隊本張仲春所帶張

仲春

利心尚輕

有稟已起程前來或畱此交其管帶何如西甯道已會

銜委張介卿今日回省道本兵備可兼顧戎務但何作霖亦恐未

能降心相從耳署白塔都司范正邦既有嗜好請卽札撤周家盛

替凌春臺當勝一籌命忠秦種種剋扣如果屬實必應撤參示儆

晚近人心難料亦不獨武夫爲然也只好擇尤懲治易玉林今日

已到仍令其作一整營其陳文英之礮隊改派督標三百攬入彼

此尙洽耳毅齋續報詳細情形與初報不甚異惟擒賊供賊之精

壯均聚古牧地一處烏垣紅廟

城大而壞

所存不過千人故古牧一破

卽空城出竄

官軍追七十餘里至鹽池墩陣斬殿後之賊頗多

惟僞王城悍賊百餘死拒

書牘卷十七

十一

而已被亂刃斫盡白逆慣於先跑黃田破柵時已先逃去未進古

牧地也此次白逆所糾陝甘之間所存無幾土回悍者已與同盡

安集延助逆之夷及南八城回擒斬約五六百人頭目伏誅者數

人聞烏垣克復時安酋已帶數千騎來援甫至距城百六十里地

方見白逆敗至卽嗾其轉戰而克城旬餘未見動靜大約亦遁歸

巢穴耳安夷火器頗精洋槍洋礮外亦有開花礮但不如官軍之

精利又不善放一敗卽不回頭耳逆夷垂涎南路已數十年見在

敖罕旣亡敗無所歸其必併死力戰與我爭此土也且俟料理善

後粗畢再說俄人原有官軍打開烏垣瑪納斯卽交伊犁之約弟

意此時暫不題及且俟南路肅清再議一則此時兵力難分一則

餉力不及先與議及交還反受其累且俄人必多要挾也高明以爲然否巴里坤古城近時商賈輻輳應辦釐金以濬餉源且茶務尤爲大宗北路旣平俄人必請開市宜先爲開辦免致臨時多費唇舌擬調陳芋生來肅與周子巖前赴巴古商辦尊意以爲可否如以爲可卽請轉飭遵調前來來時必先將釐務茶務章程案卷分手鈔錄一面將能辦此事熟手帶數員名同來爲要

答袁筱塢

惠函敬悉新疆北路一律肅清惟安集延援賊來者無多雖悉數擒斬卻須重煩兵力也勦北路賊須北路之糧蓋自然形勢毋庸多說北路各城旣克下兵南路則并包歸之糧亦非所急擬遂停

書牘卷十七

三

採運矣自同治四年至今新疆除伊犁外皆安集延所佔雖俄人亦無若之何昨次來援之賊雖多擒斬然爲數非多非盡力痛勦終爲邊患自當慎以圖之所慮者餉數不給懸兵絕域終無把握威妥瑪近復作何變相計情見勢絀亦無能爲縱令掀波作浪於大局終無大礙耳

與譚文卿

餉事急須源源接濟庶下兵南路得以一意馳驅茲查八成以上應解之餉各省仍置之不顧則九十月後又將懸釜待炊曷勝焦灼因報戰狀詳細摺陳明錄稿奉達冰案希卽具奏一面加派委員分別催提是爲至荷洋防聞英商亦不願派餉可以省事樞

垣諸公當知注意邊防能著勁一催庶有可望也

答劉克庵

安集延未受大創聞有調馬步數千督北路餘逆回鬪之說未審確否毅齋陳進規吐魯番八條請加調馬步并請飭徐崑山帶所部赴烏垣同進弟意不然擬飭徐所部各自防所向西進發并飭毅齋撥三兩營由古濟向西南進與徐張會師闢展而後親率大隊夾攻吐魯番當較穩也臺里車腳弊不在官即在紳同一可惡而紳董則尤甚焉挨站訪查亦不盡其底蘊而要勝於不查耳劉厚基申飭後尙無稟來且俟之劉連濟投河而死殊不足惜挪欠勇餉必有之事其人講排場喜揮霍自閩罷官後數年復來甘覓

書牘卷十七

三

事弟以其曾受重傷容之不料其又因挪欠致有此事聞素喜飲酒或適因酒過而然耶周士鍵缺應另委人弟已致信文卿當以吉田接署未知文卿以爲何如釐局諸較前減色自因更定新章不妥已另牘請老兄細與局中司道熟商從長計議至要聞新章多由劉文斗一手主裁自炫其能而卒至如此希察之威妥瑪形見勢絀自無能爲李相不赴煙臺雖懼爲粵前督之續而事體亦合如此孝鳳復劾之其詞甚直但不必牽及此事看來彼族伎倆亦不過如此矣

與劉毅齋

肅清北路詳細情形已具摺馳奏鈔稿送覽字字有根據卻於增

剛上見精采足慰 宸懷惟屢勝之後尤宜慎益加慎勉力圖維
斷不可掉以輕心致貽後悔曾文正胡文忠曾力主兵不宜分之
說雖老成慎重閱歷有得之見然弟每與之爭謂亦當看賊勢輕
重賊蹤整散因而定計又必擇能當一面者分任然後有分兵之
益而無其弊若守定不分之義亦未免坐昧機宜攻吐魯番必兩
面下手雖係暫分終歸於合牘尾已詳言之矣希細閱定策皮衣
已辦就見飭甯夏速解大約到巴里坤必在十月無法速之此間
所存分撥前敵各營無多餘矣大號二號開花後膛礮兩尊并子
各五百餘飭省局再解不致有誤又飭局起解七響後膛洋馬礮
三百杆一排七子每杆
配發八十排已於昨日起程此物最是利器挑選好手

書牘卷十七

古

施放定可制勝標鉞快響槍子日前又發解八千顆并加發槍二
十杆計此日始到哈密將來運道應俟夾攻吐魯番時另於哈密
添設一路轉運方期快便上海昨新到一尊田雞礮能致遠數里
外自空而下以打步馬隊之成團者最妙惜原來子只三百顆已
飭蘭局仿造俟有二百顆再解

與胡雪巖

戎事順利差爲慰心見正進規南路如果餉事應手或能如願相
償而通計今歲出入兩款抵算至九月十月以後又將停兵以待
昨將實在情形馳陳請 敕部催各省八成以上協款未知能否
應急每一思維不禁汗下心悸看來明歲借用洋款之舉萬不能

已而今冬明春則專恃八成協解之款此外別無指望一俟奉到部文自當鈔覽所欲商詢者閣下前信所云普米有款可借須秋冬方可與商嗣因威妥瑪有滇案不結不許英商出借之議弟乃有緩借洋款之奏并致書尊處詢及各國如有款可借不須關白英使或浙海粵海兩關均可出票督撫均可加印不必關白兩江或陝甘督印亦可出票尤爲便利尙未接尊處復函而兩江沈制軍又有飭吳桐雲上海道商借之事卒以先扣借本太重中止閱桐雲信知閣下并未預聞當由覷破此中圈套之故耳見聞威妥瑪自回滬後情形較從前復又改觀於借用洋款一事必不再持異議然我斷無與英商商借之理亦斷不必向兩江饒舌矣一切

書牘卷十七

五

萬望詳以告知以便酌度陳文英所解礮十八尊尙合用見到肅州令於大營旁與督標兵合紮一營朝夕訓練田雞礮已到果是利器十六磅十二磅鋼礮尙未到蘭昨次克復各城所用乃前解之十六磅子礮也安集延亦有洋製槍礮亦有開花子然不如尊處所購之精足見閣下講求切實非近今自命知洋務者所能及也日意格已來見在沈制軍處抑在李中堂處前有信通候弟已復之泰西人曉事而誠實者以日意格爲最沈與李似知之不深耳黃子穆家事何如其子能讀書否

與劉克庵

讀惠函獎誦備至俯仰增慙然新疆北路南路雖均以烏垣爲關

鍵而膏腴已早爲安集延夷吸空閱二次摺稿可得大概前此安逆爲安酋所敗菁華已竭白逆此次偷息烏垣據安逆餘地卻受制安酋不敢與抗近更削髮易服皈依彼教昨得毅齋稟訶知白余兩逆均遁托克遜地方

帕夏新於此地築三城以備抵拒官軍者

安酋待之甚倨儻

兩逆不爲所容恐仍將別尋去路安集延一種在西域回部最稱强悍看來官軍南下尙有數大惡仗且糧運仍須從古濟阜康著想無便宜可佔毅齋擬從伊犁精河一帶購收糧料價賤路近但恐所得不多耳不過就近採辦究可資貼補而省運腳卽古城新糧亦不甚貴也自蘭州至此年景均極豐秋稼已將收穫過半糧價平減此大好事

答張朗齋

書牘卷十七

六

明正使擬挑雷威儀兩營餘悉撤遣足節虛糜麾下洞矚情形代爲裁決公誼私情無弗盡者佩慰何言鏡泉書來遣資須三四萬之多弟旣以挪墊自任不能不卒踐其言謹於萬難中籌給三萬兩了此一段公案文公贖項亦致三百金交其世兄以盡僚友私情然所得爲者止此矣尊意巴古之間金軍未能撥營填紮以弟意商之鏡泉承嘅諾撥健銳兩營前往極荷注存鏡泉書來亦銳以自任殊深心感惟威儀新併健銳亦須增備器具始可成行係屬實在情形未可相強弟見檄飭徐崑山率所部會規南路各自防所分途并進大舉搜山與麾下均向闢展會隊毅齋俟東路進

至闢展始率所部南下以取夾攻之勢惟昨得毅齋報距烏垣二百三十里地方爲噶遜營卽達坂城帕夏卽帕霞已遣精悍騎賊五千人來達坂城合烏垣竄出之賊抗守白余等逆已竄往西路安集延所踞托克遜城然帕夏待之甚倨且迫其屬削髮聽約束是毅齋率所部南下必先攻達坂城踞賊分兵據守然後向吐魯番會師夾攻也弟意此時宜固守巴古濟各隘口以防吐魯番東竄之賊預將路徑察明俾各營哨了然心目又將糧料子藥及運腳一一籌畫妥洽俟毅齋大舉攻達坂踞逆有期麾下與崑山所部乃分道揚鑣相機而進所有兵勢師期麾下與崑山均宜與毅齋仔細商量乃可定局也計老謀當以爲然此次進兵必先固後

書牘卷十七

七

路以爲根本毅齋督所部先擊達坂次進吐魯番其後路在小東溝距烏垣百里柴窩堡等處應否由金和甫派紮之處尙須函商崑山由巴古之閒進兵其後路均須派營填紮已檄徐鎮萬福三營范鎮銘白馬一營前往接防麾下由哈密進兵其後路仍請明鏡泉填紮劉鳳清卽派其隨明營同紮以厚兵力如此則層層布置後顧無虞征軍得壹意前驅聲勢倍壯希與鏡泉商定以便咨會也麾下軍火宜廣爲存儲已另文解運如尙需解濟之處請隨時告知可也

答明鏡泉大臣

承慨允分健銳兩營進紮巴古之交彌縫其闕具稔高瞻遠矚誼

著公忠曷勝欽佩惟弟昨接和甫都護來函所部正勒瑪納土回
暫難分隊回顧已檄飭徐鎮萬福三營范鎮銘白馬一營前往巴
古之交填紮替防以便崑山會商嵩武軍分途進剿與劉毅齋商
定師期是此路稍有布置而嵩武既擬由哈密而西是哈密專仗
貴軍填防乃昭慎密麾下健銳舊部自以緩赴巴古之交移駐嵩
武舊壘爲是希賜照辦其劉鎮鳳清所部八百人併飭隨同貴軍
防邊矣

答劉克庵太僕

昨聞簡補同卿之喜比卽奉牋致賀計達台籤軍興以勞績翻
翩而起者多矣獨公才公望如老兄者竟遲回十載而後得眞除

書牘卷十七

六

不足爲公賀然朝廷旰食之際注意良材使海內外聞之羣有
不敢輕量天下之意則所關非細故也新疆北路悉平惟瑪納斯
土回所踞南城尙未卽復聞余小虎城臨北竄走時南城土回頭曰

黑得福旋率其黨逸去環攻南城者馬步不下數千旬日未能攻
拔金和甫自昌吉挾大礮以往未知已得手否塞上諸將除攘功
取巧外別無長處但恐至攘功而見過取巧而反拙則事機更難
覆按矣西事已有轉機無如人才太乏何前已致書總署求其廣
爲延訪預爲位置未知能見採納否餉事加意撙節似尙可敷至
十一月底若八成餉年內可催到數十萬則過臘尙可惟明春須
借餉度日耳聞今年海口缺銀出息三分尙無借者不知明年又

將何如已致信胡雪巖問其如何設法想必俟普米諸國銀到乃可議八月內尙須解銀卅萬兩始資分撥大約此後則每月廿萬足矣

答江西巡撫劉仲良中丞

敬展手牋知閩夏蛟水爲災隄圩多決幸台旆南旋速圖振救得以澹災布惠轉歎爲豐佩慰何似惟閩之被災較章門爲甚得彼中書殊深悵悵未知近復何如今歲北旱南澇沿海虛警頻聞時局不堪設想然使朝野內外人懷殫誠竭力之心則時會亦未足困之無競維人今固不異於古所云耳出塞偏師倖獲數捷甫及旬日連下數城頗非始願所及惟安集延竊踞南路腴疆十數年

書牘卷十七

充

圖之實非易易而事又有難以中止者悠悠我思云何能已高明當有以策之至貴省協解之款頻年按數如期感荷公忠久銘肝鬲弟何敢復存奢望當茲時艱同值必欲爲竭忠盡歡之舉亦獨何心惟公酌所以處之可耳與公無一面之雅而相知則實有過於舊交者九州之大相與支撐者不越十餘人掉扁舟於極天怒濤中努力一篙庶有同登彼岸之望如圖各急其私事固有未可知者區區愚忱自蒙照察

答豫錫之大臣

寶守備到滄購馬極承垂注行文番目并派通丁前往照料感荷之至後膛洋礮因襄陽轉運局慮及山水猝發人力難施議延至

秋後運解以昭慎重大約此時可抵西安到蘭則須月底或九秋耳烏垣爲新疆關鍵名爲陝甘逆回所踞實則早被安集延搜掠一空此次力攻古牧地堅巢陝甘悍賊及安酋援賊均已聚殲乘勝連下兩城大有迅雷不及掩耳之勢毅齋之功亦偉矣惟陝甘餘孽猶存安集延本亡國之餘竊踞南路腴疆十餘年又恃有泰西之援廣購槍礮招亡納叛以與我力爭此土非打數惡仗不能挫其兇鋒師行數千里不能因糧於敵輸輓勞費仍難息肩和甫都護望其能自樹立已難望其堅持後勁俾前敵壹意進取亦恐力有未逮故下兵南路未易言也弟衰朽餘年何堪重寄值此時勢欲罷不能且殫其力所能至者爲之而已來書獎勛過甚實非

所堪

書牘卷十七

十一

與鮑華潭中丞

出塞之師緩進急戰六月杪連克數城詳細情形錄稿奉達冰案新疆關鍵既得西事實有轉機惟局勢日寬布置不易刻擬下兵南路而卻顧仍慮兵單欲待徵調遠方餉源復苦不繼因思金景亭一軍向與湘蜀豫各軍共事西陲尙稱契合刻聞新疆北路肅清逆回餘孽均已南竄大漠南北可無紛擾之虞秦晉邊防自己較前稍緩可否卽移景亭全軍駐紮古城濟木薩阜康一帶以固湘軍後路俾烏垣諸軍得以一意前驅與巴哈諸軍會師南討則南路賊勢日窮北路竄賊自絕於全局屏蔽益寬而秦晉及蒙部

均可相庇以妄想偉抱公忠或不斥其刺謬也至景亭一軍聞皖與晉各認其半茲既調赴西路皖之半餉恐未必協解如前或卽由弟處撥給亦無不可如蒙惠允卽當具奏補咨并移知善將軍及景亭也

答劉克庵

副白旂馬隊已札委楊芳桂管帶飭其前赴蘭州接帶率領以西見雖飭章洪勝撥青旂黃旂小馬隊百餘分填方友升武朝聘所紮地段三百餘里地遠兵單甚不足敷亟盼副白旂之早到也各營官統領昧良負心者多卽見在委祖之人亦未可盡信見利忘義天下滔滔以此知亂日方長也可勝浩歎劉連濟死不蔽辜照

書牘卷十七

三

福建參劾宋桂芳案尙應行查原籍家屬勒限追繳成滌泉乃據其隨侍族人一稟轉詳請卹謬率至此

免其勒追家屬卹是法外之仁

深可駭怪

已批飭矣陳芋生款目清晰人尙可靠此次試辦釐金苦無熟手轉曠俄人將尋互市原議非通商情而亦略識夷情者不能料理周子巖正派篤實才非肆應故須芋生輔之請飭其亟來王尊農已經手數月當可了辦黃西春於此閒款目漸次清晰然於省局款目尙難了然可見治事之才固不易得仍希老兄畱意覓之張家川回民販土赴豫人數一行卅餘人斷不宜任其混行高令頗類唐似應預擇一明白曉事者爲將來替換之計暫飭李德昌嚴加管束不准違禁潛行語意不妨嚴厲以小儆之此時威令尙能

箝制之也得樞垣信英與俄近有構衅之事或者因俄人復奪回塔什干城之故蠻觸相爭亦可聽之我不自強望風便靡其若之何烏垣紅廟捷狀聞俄人亦極口稱好隊好隊若能將安集延了卻庶和局久而不渝然西陲軍府例用豐鎬舊家未見遠過常人是可憂也

與劉毅齋

瑪納斯本可應弦而下只因眾志不協稽延許久致土回復行抗拒遲收一簣之功金都護信來擬以大礮轟攻計可迅期得手顧未見續報克復不解何故諸軍紛集制賊之力有餘然不能一氣聯絡則所患亦大日閒每因懸盼而多意外之慮也錫子猷迄無

書牘卷十七

三

一字見示馮以和之隊亟盼其統馭七月十二日以前尙無到瑪信息大約仍是同和甫作一路耳和甫由昌吉赴瑪納斯自亦出於不得不然之勢惟烏垣關繫甚重大軍擬規南路則後路布置尤須嚴密有加巴古之間徐崑山一軍馬步僅只五營有奇而吐魯番竄路防不勝防再添古濟各路更覺鞭長莫及弟雖增調徐萬福三營范銘一營前往日內據報啟行然崑山若遵調赴烏則此路仍虞單薄若古濟一帶尊處所畱防營盡拔更覺空虛矣想卓籌早已見及細思雄師南下後路非得力可靠之軍斷斷不可金景亭年來屢思率所部馬步五千餘前來助戰其營官亦有同心聞其軍之移紮包頭者安靜整齊較前迥異見接其來信尙思

西征晉撫鮑中丞奏畱其軍以防北竄之賊其餉事則皖與晉各認其半茲擬調其移駐古濟以抵烏垣則與晉同一防北竄之賊而於皖固無與也已函商鮑中丞晉照常認其半隴認其半免皖解濟似屬可行景亭當可攬轡而來矣惟包頭至古路隔四千餘里不能應念而至其未至之前應如何籌措尙望酌度示之至三四兩起馬隊已飭方友升擇日拔行此外則正白旂青旂尙是老隊見檄章鎮洪勝併成一營親率赴烏聽候調遣其武朝聘一營則令赴朗齋處助剿昨日接奉八月初九日總署寄函威妥瑪等有向樞邸代喀逆乞降一事所指阿古柏或卽係帕夏英人稱其爲喀王若不知其爲竊踞新疆南路之賊只稱願作屬國并不說

書牘卷十七

三

繳還入城樞邸答付之詞甚爲得體弟擬日間覆之帕夏竊踞數城十餘年爲我必討之賊官兵進討叛回又派兵助逆白余等敗竄南路又復招納隱容該逆等向其說合求降英人自應置之不理况據梅縉譯說非阿古柏託人求威使說情威使尤可不必管如慮喀賊遣人到營我營認作叛逆將其殺害我且恪遵總署鈞諭傳令所部總統分統營官如喀什噶爾有人來營投遞呈稟若非帶兵前來應准其見面如所言尙近情理准其護送到肅州大營聽候吩咐如無情理卽由該總統等放回不必殺他至於戰陣之事權在主兵之人非他人所可參預用兵喀地久暫固難逆料阿古柏能否久駐我亦無從懸揣英使所慮用兵日久俄人從中

侵佔一層似不足慮俄人雖駐伊犁然駐兵不過一千近且減至八百是原議交還一說似非虛言若謂更思侵佔南路無論我不能允且俄本大國亦斷不肯自失體面即使帕夏投誠獻土俄國亦必不受南八城自乾隆廿四年入中國版圖至今與五印度無纖毫之損豈賊踞此地則於英有益中國復此地翻於英有損乎以此復總署總署卽以此告威使當不致別生枝節也高明以爲然否見在洋防已經定局准開十三口准免洋釐計每歲失去千萬之利均爲英人所奪樞垣與李相專一示弱時局未堪設想此次英人進京似專爲帕夏求降驕氣稍斂聞其與俄構衅恐安集延爲俄所佔不利於印度也烏垣紅廟之復厥功之偉天下當無

書牘卷十七

書

異詞如果南路節節順手則麾下功勳冠於寰宇所當慎益加慎
覬勉圖之

答金和甫

奉到惠書知麾下克復烏垣後旋有昌吉之行又因瑪納斯南城餘回抗未就撫復赴瑪督勦賢勞獨著欽佩何言前奉函示已挾大礮前去計孤城自當速下惟各軍雲集號令紛紜頗費調度殘賊處必死之地心力易齊或亦有難以輕視者想麾下蓋籌默運洞矚無遺必有以處此計捷報已在途矣 諭旨進規南路事不宜遲區區愚衷竊以爲進兵必先固後路務令卻顧無虞然後壹意前驅餉道常通軍情益奮北路自古濟西至綏來城堡林立新

復各處均須相其夷險衝僻酌分將領帶所部駐紮互相聯絡以策萬全毅齋前進兵分見單亦須於切近要隘分駐勁軍以資策應所有一切如何布置始期周密之處請麾下通盤籌畫詳以見示又新復地方撫輯流亡開辦善後一切均極緊要伏乞迅速示知以便照辦麾下智珠在握就近指揮自期周安弟或有管窺所及亦當盡其所知以備採擇斷不敢自匿其愚至下兵南路麾下或率偏師鼓行而前或暫畱烏垣扼其關鍵以維全局亦乞示知以憑入告緣師期甚近相距甚遙不得不預爲籌及也

答曾沅浦

接奉惠書備承獎飾另楡親揮柔翰自稱日疾未愈而實則下筆

書牘卷十七

五

精審有過少年儻再放光明當於芥子上寫楞嚴一部也洋防議定十三口之添釐金之免旁人無從置喙從此餉源日寔銷兵無期何以待之石泉中丞兩次乞休未得而餘杭一案猶懸弟前促其決作歸計恐亦難於抽身司馬公有云常調官好做一置臺省則勢難自遂矣準部速復燕晉內外蒙盟稍可息肩正擬布置後路一意前進昨接總署函告威安瑪等赴署復有伐南路逆酋乞降之請託詞恐俄人乘機竄取於印度有害於中國邊界亦多不利圖入場攪事樞邸答之和而能峻狡謀暫紕將來恐不免生端議款以來彼族從無卑詞祈我之事今忽如此是必有故始悟前此不肯借洋款及滬上申報歷言西師不可輕動及造謠我軍敗

退關內者非無因也荆公晚年每書空精拙淡三字正合此時事體也

答金和甫

錫子猷與徐副將不甚浹洽前有所聞卽以奉告承示改撥兩營以防北之軍改而東祖已與子猷商定惟古濟池西要隘甚多兩營似尙不敷分布 諭旨進規南路則北路應預爲綢繆務使毫無罅漏乃可壹意馳驅尊處兵力難分本係實在情形似一律肅清後尙煩籌策大約將領得入額數精實自可圖效耳瑪納斯南城自黑保財竄逸應不費手而竟能穩踞許久亦非意料所及聞因孔徐議論不合致滯戎機殊爲惜之攻堅除開地道用大礮外

書牘卷十七

美

本乏善策而地道大礮兩者亦有得手與不得手之分弟已屢見之卽肅州亦何獨不然乎計官軍之環集城下者當十倍於賊長圍早合當可蕺事前奉惠書知已攜布礮前往未知已轟開缺口否缺口如已轟開搶入時猶防喫虧巷戰亦須著意蓋籌想已及之矣錫子猷自咨委後弟處未接其一次函牘亦不可解公事往復所不可闕已咨詢之吉爾洪額須俟尊處委人接帶乃可到案兩次 諭旨想已欽奉遵行俄人近日有來尊處者否糧已收齊否請隨時示及如有俄人商詢事件請其向弟處說話以憑答付緣總署時有函至也

答劉克庵

楊芳桂在營十餘年戰績未著弟以其爲馬佑庵所舉人尙老實雖曾加督責卻不料其荒唐適范秉誠稟已由西甯大通帶馬隊前來卽委赴甘州接帶分各處填防免副白旂空煩往返見接范秉誠稟報八月廿七日交隊回營尙未接楊芳桂接帶稟報茲承函告該鎮行爲荒謬至此殊屬可恨當卽嚴加訓責看能醒悟與否如敢仍前縱恣卽與撤參斷不曲法貸之此輩居心直不可測惟有犯卽懲不容其善脫耳餉事似尙有續到之款昨請部查催而批旨已徑諭沈葆楨等是較部催更加勁也金和甫攻瑪納斯南城迄未得手弁頗失利已邀劉毅齋往攻毅齋派譚拔萃羅長祐前去八月看數日內有捷報否甯夏之精選毅軍既不得力自以

書牘卷十七

七

裁併爲是只要辦得到就好劉昌選已斷煙癮其好利與否則未可定此間見以辦新糧清運欠資遣馬步各隊爲急務均須見銀發給暫請每月仍發餉三批以資應手

與劉毅齋

就目前局勢言之下兵南路宜先固北路古濟以西至烏垣節節空虛匪徒出沒金都護雖撥錫領隊帶馬步東來然皆殘廢之旅亦未可恃尊處派往各營宜趁未撤回之先速與蜀軍嵩武約期同進搜山排勦事畢然後以錫領隊守之一面令其加意整理否則難期實際錫領隊自咨委後并無隻字見覆亦不解其何意看來此君亦不足恃是我軍進規南路以烏垣爲根本烏垣宜畱兵

由烏垣攻達坂雖止二百里然中間有路通托克遜堅巢宜擇要安營而賊勢既趨重達坂又需重兵痛勦蜀軍嵩武合力規吐魯番吐魯番回眾離心安集延所遣援賊無多似無難攻克然該處地勢平衍轄境又闊與托克遜毗連吐魯番縱能速克各城堡須畱兵鎮撫後路運道甚長須安兵防護其能出隊會攻托克遜者恐必無幾是進規南路之軍屢分而單而攻達坂接攻托克遜少分助之軍也南路自乾隆二十四年平定回疆建八城一喀什噶爾一英吉沙爾一葉爾羌一和闐一阿克蘇一烏什一庫車一喀喇沙爾而吐魯番不與焉托克遜尙是吐魯番轄境過此則喀喇沙爾所轄之蘇什巴臺爲南八城之首將來兵進至托克遜追奔

書牘卷十七

天

逐北至阿克蘇作一停頓

道光五年辦張逆先駐此蓋地勢扼要且饒水草也

或分兵進葉

爾羌和闐或徑擣喀什噶

爾兵防伊犁皆須臨時斟酌然三路分布之局不可不預

少一路之軍不佞

以擬調金景亭一軍者以此瑪納斯南城本

可收撫因孔才執意欲勦徐學功不能與爭而外來各軍羣思居復城之功摩拳擦掌以待及攻堅不下乃請和甫都護親臨督勦

都護恃大礮以爲成功可期遂貿然而來至此則銳氣索然矣一夫不可狃況一城乎且一城之中矢死抗拒者究有幾何老弱婦

女豈必盡加屠戮尊處派譚羅前往可勦撫兼施此信到時當已

早見分曉如城中食盡見我軍至而求撫亦可許之然必由金都

護定見乃免異議此事亮於大局無礙惟都護卸底無以示遠人耳桂錫楨馬隊亦尚可用惟其人頗猾方友升人尙勇往所部仍是南馬隊規摹不如吉江之緊章鎮洪勝正白旂雖是老隊然不過中等兩營人馬俱足合之桂錫楨近千騎將來金運昌到所部千騎當較勝也侯名貴大礮二車輪小礮四均可用管放之人一併隨來聞在玉門嘉峪關又添收數十人則不知何如子藥均足七響馬槍三百杆每杆八十排每排七出一杆計配子五百六十出藥照子配可云精當方友升章洪勝兩營各發七響二十杆子各八十排餉事除發過五萬兩外又飭丁道發二十萬作兩次發始可周轉攻克烏垣城中所得賊糧應歸公其各營收穫之糧給銀八萬兩以償

書牘卷十七

完

其勞銀須緩解不歸餉算尊意欲用徐學功此人原亦可用惟須束以營制核減餉章照土勇章程每月二兩以常理論進規南路須俟金

景亭到始穀布置而策萬全然此軍到烏垣總須冬臘之交如軍機不能久待則俟瑪納斯收隊回營古濟各營搜山事畢桂方章到齊亦可稍資指揮其蜀軍嵩武之進規吐魯番師期應由尊處酌定乃期有當也

與豫錫之大臣

賓守備所購番馬軀軀雖不甚高大而頸長腰促臆寬蹄斂大致一律較之庫倫所產稍勝西征宜多用北馬以其轉旋靈便非若西極之馬長大而笨也番產宜登山過險力量亦足視西產爲優

昨差官自烏垣回營毅齋令帶所奪安集延兩馬來貌可入畫而行空闊之地爲宜一過山徑不甚便捷軍中健兒多不尙之見練精騎并調甘涼貢馬及巴里坤孳生馬選馬兵操習翼可合用亦欲爲全隴開風氣未知果能如願否

上總理各國事務衙門

八月二十五日奉到鈞諭并承示與威使問答各節謹已領悉安集延酋帕霞即夏音轉竊踞南八城及吐魯番并助烏垣紅廟陝甘各回爲逆中外共知茲威妥瑪等代其請降稱爲喀什王阿古柏若不知吐魯番南八城爲我疆土帕夏爲我賊也旣代其請降又稱非由其央託旣稱願降又祇請爲屬國免朝貢於歸我故土縛獻逋

書牘卷十七

三

寇概不之及其敢以此妄瀆尊嚴者意沮官軍深入與前此喉上海申報局刊播謠言禁止洋商息借洋款同一機局鈞答於接談之頃預燭奸謀隨機因應不假安排正大和平足懾奸袤之膽欽服何言宗棠已密告劉錦棠如安集延酋呈遞稟詞察其語意略近情理許爲轉達將原稟及來人帶解肅州聽候核示如空言支飾意在緩兵卽將其來人縱回釋勿加誅并傳知各軍一律放行毋許擅殺應否示知威使之處伏候鈞度前聞春閒赦罕舊部糾黨潛襲塔什干城殺俄人之畱守舊都者爲興復故國計俄人旋舉兵奪回塔什干并擄其二王子以歸未知確否近時俄英交惡其畔端是否因此而起無從查詢要其懷利相接其交久離固可

知也威使所慮俄人從中侵佔此地一節查安集延本境東與喀什噶爾相連故道光年間張格爾之變卽由此而起用其部眾爲軍鋒張逆之踞四城多資其力其東少北近與俄新闢之境相連頃張提軍曜鈔閱新來投誠之闢展人阿哈默特口供具言帕夏見畱兵在喀什噶爾西邊防俄羅斯緣其地與俄只隔一河時有俄人過河搶鬧是安集延畏俄之偏在其本境東北緊連處所非南八城之謂特恐官軍進攻南八城彼首尾受敵無以自存也安集延旣竊踞南八城阻我進兵克復更欲我保護彼疆不被俄人侵擾設心當不若是是英人代爲請降非爲安集延乃圖保其印度腴疆耳俄英共爭印度數十年矣印度東南之地爲英所有其

書牘卷十七

三

北與西爲俄所有若由東而漸及於南英之腴疆將折而入於俄威使所云與英之印度不利者以此至云與中國邊界不利則有不然俄之代復伊犁亦自知處非所據原有俟烏魯木齊瑪納斯克復交還之約其駐伊犁之兵不過千人曾於無意中詢之索思諾福斯齊及烏史漫達迷勞伏所言皆同可知俄於伊犁本無久假不歸之意謂官軍進規南疆彼將乘機而收漁人之利似與其平時以大國自居顧惜體面不符英人謂與中國邊界不利不過借此聳聽忌中國與俄交密思所以離之耳至南路賊勢重在達坂卽噶遜營吐魯番托克遜三處官軍南下必有數惡仗三處得手則破竹之勢可成察酌彼已情形仍非緩進急戰不可雖轉戰四千

餘里蕘事難計遲速然果餉糧軍火轉運應手亦不至久滯戎機無須英人代爲過慮也以愚見言之此時俄人交還伊犁一節暫可置之不論北路鮮獨當一面之才縱向其仍理舊說要挾必多而收回後若別有意外之虞翻難兼顧不若姑以此委之俾得壹意南路如果南路事機順利似伊犁亦可不索而還論西域棄畱者自乾隆年間至今未歸畫一利害計較各有所見應如何折衷以歸至是計 廟堂訂謨早定非愚陋所能臆揣惟據事體言之則地之棄畱及一切措置之詳均宜俟南路事竣方可置議未審鈞度何如伏希誨示

答陳俊臣

書牘卷十七

三

讀中秋後四日手書知從邸鈔得悉捷狀與少陵聞收復薊北之喜略同字裏皆挾喜氣過蒙獎誦殊覺赧然近正布署後路調度軍食俟諸事完備乃擬南征惟頭白臨邊罔知攸濟未審將來究竟何如受 國厚恩無可爲報年衰任鉅量淺術疏時深內疚惟盡心力所能至者圖之期於不欺而已至成敗利鈍在我者不能不明辨深思在天者不敢參也竊以爲近時人心之蔽每因此關未能勘破遂爾見異思遷奪其素志浸欲崇般倕之社而廢澤宮精考工之言而棄官禮慎孰甚焉今試以藝事言之聚儒者於一堂而課以金工木工之事固問十不能答一蓋以非所習也與華之百工校且然況秦西師匠乎治天下自有匠明匠事者自有其

人中不如西學西可也匠之事也然奚必胥天下之人而匠之又并治天下之匠而薄之哉一事之成敗利鈍非所能知因成敗利鈍而喪其心之所以求有成無敗有利無鈍必不可得也況所謂成者利者乃天下所謂敗與鈍乎范文正有言吾知在我者當如是而已近時自負深知洋務者殊未之思耳來書謂曾君昭吉所造馬力機器仿製馬梯槍試之與西槍等第處有粵人仿製布礮及標鍼快響槍俄人亦極贊之昨次攻拔古牧地深得其力如得彼此合併講習當更可觀也前在閩奏設輪船局各疏已刊成帙因中有未經發鈔之件故未敢分致諸人茲奉上一本乞覽勿以示人爲荷

書牘卷十七

答劉克庵

釐務宜酌量更定董研樵所稟似有所見且看其續擬如何張介卿尙肯用心講求魏午莊所辦本有起色安肅史道尙能守舊如鐵紹裴速到甘涼亦可望其加意整理惟甯夏道府恐難振作鎮迪一道見雖如巴古試辦卻是賠錢生意所盼兵事順手俄人互市或有生發耳且將章程酌定規模立起再看運氣何如雅片不能禁而罌粟之禁斷不可鬆弟自度隴以來所力持者此其一事察看近來光景吸煙之人頗減於前種罌粟之地亦實較前爲少若從此逐漸加緊似亦足去其太甚外閒議論不同是真是假暫不必說然勸種棉花禁種罌粟事在必行

甘土向本著名行銷最廣近則寥寥狄道亦然

可見守令認真事無不辦張介卿上尊處書所言何作霖膽氣好人亦無他但不知經理且好賭耳

代人受過請給養廉本係批准之件記是三千應飭司照數給領蔣月華聞已繳截請

免參辦以尊意准之可也天下事不能做到盡頭畱幾分餘地亦見度量

平心而論若輩何能以繩尺律之但令心有所憚卽當畱用如蔣

月華之無用卽罷斥可也參辦可免成滌泉稟請開缺自因劉連

濟請卹未准具奏且贖尾手批語氣頗峻故不免芥蒂實則原稟

太無分曉弟已於復函中畱之晤時并希道及聞近來寒嗽轉甚

頗以爲念大疏所陳吾湘近事自是正論夔石中丞待紳士多過

於寬容然觀其於前郡守宋公及前方伯涂公尙能容異量之美

亦殊可敬近時齋匪之風甚熾幾於無省不有然亦斷無能爲惟

書牘卷十七

七

官吏以正俗防民爲務遇有覺察卽予嚴辦乃期漸挽頹風若以
理數而言此等異端左道皆起於亂世正氣衰頹之日曾見陸放
翁老學庵筆記所載當時邪教如清頓圓香太陽及喫菜祀魔等
名目不下數十種放翁深以爲憂然後之亡宋者元人非諸邪教
也日色陰晦風霾蔽天則鴉鳴狐見若皎日當空安得有此我

朝聖聖相承深仁厚澤洽於民心故天亦加意眷佑近如與俄連

界之哈薩克部落蒙古番也同治年間曾割畀俄人哈薩克地雖屬俄

而部眾不附俄不能強吐魯番人雖爲安集延所脅然來降者每

言欲仍歸天朝蓋經外國征斂之苦愈知覆載之恩也域外

之民尙知感服豈內地翻不如之譬如人身元氣不足所患不過

疋悴瘦弱雖疾病不至遽死也醫者不能補其真元但扶其正氣亦可延年卻病今日之事何以異此哉漢中之天主教魏明德已避入湖北鄖陽兩當之教民已飭遷於秦州此則近事之驗也故愚意有治人之責者宜先明禮教其禁民爲非則亦治標之說不可少也非所急也高明以爲然否北路瑪納斯土回聞湘軍到有乞降之說見正勒繳馬械劉毅齋病傷寒幾殆昨得其營務處信前月底始服藥見效此時當可全愈惟復元尙有待也徐崑山張師美兩軍正搬運糧料子藥候總統約期進兵大約徐張攻吐魯番總統攻達坂城兩處克復乃進攻托克遜堅巢其師期則徐張先而劉後賊勢則達坂重而吐魯輕也白余兩逆則已入托克遜

書牘卷十七

壹

與安集延酋帕夏同住我能打開此三處可取破竹之勢只愁糧運不繼耳兵到阿克蘇必須分爲三大支一通伊犁之路一通葉爾羌和闐之路一直擣喀什噶爾至此始與道光年間打張格爾局勢相同也前在陶文毅館中見有一疏稿係覆陳西域事略

未刻

其時喀什噶爾邊外卽報英吉利商人有從邊外過北路售貨者當時不知其所自來以昨威妥瑪代安集延乞降之事言之則泰西與敖罕潛通蓋已在數十年前矣封疆諸公從未有議論及之者亦殊可怪此時機局不能住手昨與總署約略言之看其如何定見都人議論總以停兵不進爲是蓋不知數城已克也見在又如何打主意尙未可知威妥瑪到煙臺神氣沮喪其驕倨之態大

滅蓋彼已得電信恐我與俄交益固則失其南印度產雅片腴疆也任他千萬變相老僧只有不覩不聞一法待之所慮者餉源驟斷不能一氣呵成又人才太乏此時得手後仍拱手送之耳書至此惟有仰天一歎

與張朗齋

所需七響後膛槍及原來子藥昨文章丞運解廿杆此種最爲合用每槍一杆配子八十排每排七出合五百六十顆前發武朝聘槍與子亦是如此令營哨分領擇好手兼有好馬者用之自期得力惟須先以幾排子練習熟便庶心手相應也聞尊處自置者不少似須照排數發子爲要緣用此種洋槍者每苦槍子用完則槍

書牘卷十七

美

成廢物不可不加意點檢也吐魯番降人阿哈默特所供賊情賊勢似近真確看來規取南路

進兵時似可令其嚮導通消息貼告示

非兩路并進不

可而并進非各就道里遠近險夷及有賊無賊算計程期以爲彼此先後次第不可大約賊勢注重托克遜而以達坂吐魯番爲其屏蔽達坂之賊多於吐魯番將來吐魯番得手須合力打托克遜屆時如達坂未克卽合攻達坂以收夾擊之效以中外情形而論國朝蕩平準回兩部以來累世深仁厚澤旁皇周浹洽於人心回

番久享樂利實古今所未有俄羅斯得我哈薩克之地而哈薩克雖去其地其部落則仍願爲王人聞南八城回情亦不服安集延蓋皆畏詐力驅迫而仍思寬大舊恩之故此大軍所至非申

明紀律嚴戒殺掠不可如能以王土王民爲念則南八城易復而亦可守矣前發各示稿希與同袍諸公共勉之瑪納斯南城聞於前月廿四日繳馬械尙未接譚冠英稟不知有無中變所慮同事者之債事也毅齋自前月患感冒漸次加病幸聞月底服藥得效此時料已全愈然月餘未接其函牘時爲懸懸

答晉撫會沉浦宮保

接奉惠函欣悉移節晉疆不日即可履新慶幸無似十年舊履忽拜 新恩知 朝廷倚注方殷 眷睠未替非悠謬所能閒也新任計可速到台麾西上受事計在初冬翹首雙旌相距日近從此區域遙連不虞隔閼得以常親雅教尤愜所懷數城連復本擬卽

書牘卷十七

三

規南疆因北軍議論紛紜致戎機稍滯毅齋自前月偶染時氣一病幾殆幸南醫療治得效漸就痊可然復元尙有待也哈密巴里坤西進諸軍布署已妥師期必俟毅齋約定乃可分道并進免有參差由吐魯番至喀什噶爾五千里有奇將來節節攻入卽須節節駐守兵力屢分誠虞跋扈故有咨調包頭防軍之請緣金景亭所部本與毅齋舊日同袍頻年屢以西征爲請所部馬步五千尙是整支勁旅置之閒散亦覺可惜耳接華潭中丞信已承轉致景亭促其西行老兄履新幸一力速之

與劉毅齋

前聞偶抱微疴以遠道乏醫時爲悵念嗣見袁君與心可書知服

白虎湯見效昨見與心可書諸病悉除惟精力驟難復元尙須調護此則病後常事屈指已近一月加意葆衛必早復元惟於飲食起居善自珍愛爲要壯年氣血方盛新愈後補足之劑易於見功惟不宜過峻耳瑪納斯南城食盡援絕自無他變譚冠英等自可了辦惟諸軍雜處議論紛紜恐不免意見債事和甫不能自主亦無如何只盼早時戴役迅返烏垣卽至幸也南路局勢前已詳致張朗齋徐崑山兩處均已准備師期必由尊處約定乃期先後緩急各適其宜安集延酋以詐力脅南八城及吐魯番而以重斂爲事人心早離只要頭節打通官軍禁止擾掠則王土王民何分中外且鞫且撫第二進卽可徑抵阿克蘇分三路規復全疆似非難

書牘卷十七

事惟官軍攻克一處卽須分兵畱守一處比至前敵則兵數日少殊非十全之道故檄調卓勝全軍實不容緩准人耐勞苦不戀鄉土於此處相宜金景亭與所部營哨近時力加整頓能行其令願賦同袍屢相絮聒一聞檄調必能迅赴戎機昨得華潭中丞復函深以爲然惟於餉事仍欲皖認小半并屬卽致善厚齋將軍以邁其行見在華潭告病開缺曾沅浦接任晉撫當無異詞景亭所部到防必速此軍到防可資臂助勝於仰面求人耳錫子猷領隊自咨委後弟處未接其隻字昨接馮以和稟所部殘卒已交其統帶銷冊呈交該領隊亦并無一字再四籌思不解其故大約和甫從中或另有擺布所撥該領隊之營均係七零八落何能望其得力

前函致尊處分布古濟一帶至烏垣各處與徐崑山所部分道搜
山據函贖俟錫領隊到卽便撤令回任見據丁道報賊仍竄擾劫
掠錫領隊不理聞亦不能久駐彼處此一帶究應如何布置希卽
告知看來尊恙雖愈復元恐尙需時瑪納斯南城克復稽時是下
兵南路未能剋期大舉節交冬令冰雪載塗亦非用兵之時似宜
蓄銳以待方期周妥也

惟乘此閒暇將後路
搜剿清楚乃爲妥便

前承函告軍糧合各

處儲積可敷至明正擬令古局採存三萬石弟意以二萬石儲備
尊軍以一萬石留備金運昌之軍其牛籽收回之糧則畱爲車馱
食用如尙不足則仍須飭古局加採萬石庶可接新但不知古局
能否加採如數耳西湖大米是否可採徐學功所諾四五十萬斤
究竟可到大營否見飭甯夏採大米解巴里坤如可合算則由巴
里坤運哈密爲以後轉運行營搭放軍食亦是一著大軍克復吐
魯番達坂城托克遜則運路當移哈密以資便捷屆時再擬

與善厚齋將軍

歸包採運一切諸承照拂屢得陳守書極深紉感秋閒連復烏垣
紅廟諸城師行日遠軍糧尙可就近籌採已疏請將各處採運之
局暫撤以節勞費此後當於新疆興辦屯政庶規久遠惟遺黎僅
存一時殊難招致恐成效未能立睹耳出塞馬步共只二十餘營
見擬進規南路須畱營防守以資後勁而吐魯番及南八城由東
徂西爲程五千餘里又須預爲布置庶得尺則尺可免前突後塌

之虞因思卓勝馬步全軍五千餘向稱得力金景亭頻年共事朔方與敵軍統領營官素相契洽每因在防無事不免髀肉復生之感見在北路肅清竄蹤已斷卓勝移軍西上可爲敵軍後勁亦卽晉省遠防似與大局實有裨益麾下智珠在握當以爲然弟已致書華潭中丞詳爲商詢已蒙慨諾幸飭景亭速整行裝分起西上能於初冬起行則氣尙和煖人如挾纊弟當於入境之處飭所司照料也

答劉蔭渠

滇中近事頗有所聞來書所言兵驕民困眞洞見癥結之論權收已替患弭未形下手工夫亦卽功效之極公言及此滇之福也弟

書牘卷十七

早

頻年涉歷危疆於浙懲槍划平台州諸暨土匪於閩化械鬪捕海盜於隴散黑頭勇丁皆與麾下遣民兵汰練軍之意相同泰西惟英吉利人狡黠特甚時論專務包荒煙臺定議國勢日卑將來非決戰不可彼族近與俄國構釁恐俄與中國合思離其交因烏垣克復時并殲安集延夷兵五百彼卽爲安集延求降於我意在保安集延護伊東印度卽此可覘其伎倆矣天下豈有不了之事但由今之道無變今之俗則正未可知耳

與劉克庵

龍雲階調停副藍旂一案據稱儘宜准結免其深究昨來肅州面稟尤成章尙無剋減重情弁丁因其少發馬乾致心懷不甘見經

悉數吐出已無異議弟批飭准照所稟辦理惟尤成章既經弁丁控訴未便仍令管帶見檄陶署提代爲接管飭尤赴省聽候尊處查辦可免另起衅端擬卽委陳參將元萼回甘接帶當能整理陳芋生在此曾稱蘇有慶接帶鄒耀堂之半營兵力頗單且該旂勇丁不服管束弟擬將剛毅各營內撥一營前往接防撤該半營赴省整理此起勇丁係由懷義營分撥本非孝子順孫見在人數太單殊非久局到省後宜分別汰畱惟高明酌之張介卿署西甯道光景甚窘須議給津貼每月非百金不可肅州鎮委陳春萬署亦非每月津貼五十兩不行平涼委李守國賢張蔭庭應委一缺以慰其遲暮之心或府或直隸州但須安靜稍可過活者可耳兄意

以爲何如

與崇峻峰方伯

書牘卷十七

望

周子巖陳芋生委辦巴里坤古城釐務已於前月底成行一因北路餉源日涸不能不早爲之謀一則百貨自東北來者均無稅釐價值平減自關內運販者釐稅稠疊成本過重銷售維艱商情裹足無以廣示招徠且俄人方議互市非及早定章則議論必費唇舌也惟開辦之初不能求贏恐尙須賠本耳今日接曾沅浦中丞信言及新授鎮迪道福裕號餘庵乃倭文端令子旅橐蕭條屬爲籌畫到任盤費計此時已可行抵西安弟已飛致沈吉田妥爲照料抵蘭州後希於無礙款項內撥給盤川如攜眷而來應屬其安寓

蘭州輕騎來營稟到文端與弟頗屬心交能畱住此間講習吏事
時事然後履新則鄙懷稍安也瑪納斯南城尙未得手因要功之
故遂滯戎機可勝慨歎

答劉毅齋

頃接九月初旬及十三日函牘知尊體康復如常仍卽親治軍書
精神煥發至慰思念所論兵力賊勢一切與此開前後所發函牘
大略相同已一一手批見覆矣蜀軍正辦採運嵩武條理秩井然
亦未能驟爾南拔至古城採運一事似均是空言尙未報有成數
計所發之款可通挪應用者共五十餘萬不可謂不多不能以無
銀藉口也其運務尙未辦動陳糧存倉者四十萬安論新糧民車

書牘卷十七

七

駝因車壞驟疲不受迫促日漸逃散據丁道稟只牘二百輛尙有
逃者官車官馱見運安西哈密巴里坤不能再派古城運烏垣見
飭王道詩白將歸包甯夏運糧駝隻押赴古城運烏惟運道不靖
古濟迤西無營實力防護車駝視爲畏途前此屢咨和甫都護均
置不理昨接其函牘并咨送摺稿派錫綸防東路錫綸昨始有咨
呈來據稱只有馬隊一百五十名隨其東行其餘均畱瑪納斯而
此一百五十名內又撥去桂鎮三十名交尊處又撥去捷勇馬隊
三十餘名送餉赴瑪納斯止餘定勇馬隊八十餘名隨錫綸駐古
城是錫綸應作罷論也徐崑山一軍不能越古城而西尊處以分
援瑪納斯而兵力日薄不能派撥護運坐視山賊伺掠運道梗阻

將如之何卓勝軍已有信到正趕買駝隻添製帳棚迅卽西來大
約臘底正初始可盼到進規南路其必俟明歲仲春之吉乎屆時
尊體全復天氣和暖冰凍消釋後路布置層層周妥制勝之權操
之自我上策亦穩著也所以調卓勝者此時作後路護運道將來
南路底定伊犁收回并可以實邊圉爲不拔之基不比南人不肯
輕棄鄉土也若輩不肯回故土益畏向日仇怨也區區意念不遽告人惟高明自能
鑒之制賊莫善於用閒白余圖安集延安集延圖白余均有可用
之機然非官軍前進得數好仗則亦難語此總署信件已鈔送尊
處可知一切窳竅遇有安集延人至當照信辦理不必殺之繳入
城獻逋寇事雖不成亦可令彼自相猜忌惟此等事不過題中應

書牘卷十七

望

有之義不可注意於此反致誤事白余縱有回稟亦不必輕信致
受其欺瑪納斯南城賊食未盡數日內未必成功仍以長圍困之
斷不可急切圖功致多損折惟多掘地道日夜作進攻狀以勞之
迨其疲乏裝藥發火必可了事大礮有神喜潔淨而忌汗穢若管
礮之人未能虔誠禱告或間人不潔之手隨便摩娑往往施放無
准可諭莊偉等知之如不能洞穿牆身則飛子墮入城中亦可多
殺西洋人用此等神器本不取轟坍城垣惟取從空下擊令人驚
惶得以乘機下手故名曰天礮今之攻城堡者用爲平攻之具實
則非製礮之意也

奉九月十九日惠函知因清恙擬就醫漢皋如未易痊卽續請開缺頗爲不釋前此撫秦不果改而行河論者謂有沮之者其詳固不得知至此次 朝廷特簡撫晉則讒慝之口終不能行而晉重於秦 簡在自有深意乃因量移引退於義似有未安連日與幕中諸君論及亦均未能仰測高深再四尋思或者局外影響之詞故相搖撼未免爲所動耳出處有道義與命內度之已豈可有人之見者存明者當早已洞及鄙意續請開缺一說實可不必如任晉後道仍不行則拂袖歸來猶未晚也進止之宜伏維三思

答譚文卿

餉事極費清心當可有望峴莊旣竭力籌維解有鉅款與掉臂不

顧者不同公義私情尙見兼到始愧前疏之錯料也吳子健中丞素無一面於西餉尙肯畱心近接吳桐雲信渠代管滬局每月承解五千以三局言則每月一萬五千兩亦由吳中丞飭辦者然尙未接起解文件大約爲幼丹制軍阻攔耶以天下古今情理而論不應有此然賢者不可測亦復何所不至哉洋防本無可再辦卽照前辦法亦有防無戰所費幾何乃必糜至艱之餉養不戰之兵何也鮑中丞君子人也於隴餉極肯照料以病乞退而沅浦接任尙望能照前辦理近得沅浦書擬告假一月赴鄂就醫如醫治不效卽乞退休殊出尋常意計之外或者有人閒之耶弟已復函力止未知其見納否紙人剪髮之謠道光初年亦曾有之其時并有

雞生四翼五爪啄人影輒死之說弟時年已逾十齡親有所聞而實一無所見父老指爲雞禍指爲白蓮教所爲後亦無它蓋此等妖孽之興都由正氣衰頹之故譬猶晝晦陰霾則鴉鳴狐噪耳人事所當修者修之物無可憑焉能爲害傳謂妖由人興是也非僅搜捕示禁所能爲功三原富庶而世教不興吸鴉片之人鄉居其五城居其七其風俗之敝如此衰氣之乘不亦宜乎瑪納斯南城九月中旬尙無克復之報一念之差戎機遂滯毅齋一病幾殆幸已全愈然復元尙有待也轉曠大雪封山不能南下又須俟明春耳

答蘇撫吳子健中丞

書牘卷十七

墨

承示蘇協准餉甯協西餉弟早有所聞文正當時以合肥相國撫蘇駐節滬上爲餉源所自出故卽以此屬之其於西餉則斷斷焉蓋其時方與弟隙又志在東南未遑遠略也然於協隴則吝而於應解老湘月餉六萬則按月委解

後因調回章鎮減解一萬五千兩

無少遲回若

馬端敏李兩亭何小宋之督江張振軒之撫蘇則均於解湘餉外急謀協隴諸君子前後一轍公試檢舊冊當知其詳峴莊權兩江督篆頗以隴餉爲念意俟新任到則諉之然於湘餉未解時引爲歉也弟自出山以來備嘗艱苦由湘歷閩均未嘗請撥部款蓋東南諸行省尙可於捐款釐務設法不獨取給一時而於浙則增四百餘萬於閩則增三百萬內外歲入至今猶然比調陝甘則偏入

窘鄉一籌莫展矣隴之苦瘠甲於天下通省地丁錢糧徵額僅二十七萬兩有奇變亂以來徵收十不及一所恃以支持數年者專在省關協款其仰面求人良非得已也回思四十年前課徒自給每遇歲闌解館出紙裹中物還鹽米小債外心中無事隱几吟哦直是天上矣出塞之師連下數城後卽擬進規南路因秋後協款稀到遂愆師期節屆大雪封山又須待明春始能整旆南下承示分催兩方伯殫籌報解不任諉延極佩公忠偉抱感荷何言引領江東日夜以俟

與安曉峰孝廉

不見年餘想所學益進聞寄居頌閣先生處下帷攻苦無異在蘭

書牘卷十七

吳

山時殊用欣然寄上粟銀三十兩爲膏火薪炭之資幸驗納明春隴士與試者當不止百人寄銀三千兩請閣下按人俵給可與柳堂先生商之四十餘年前金盡裘敝人困驢嘶景況猶在目前也與沈吉田

冬令和煖如秋肅尙未降雪想西安亦同之武闡計將畢事矣陝省錢糧想已完竣刻值協款報解寥寥明正以後無可指望洋款能否商借雪巖久無信到殊爲懸懸縱能借有准數而匯到需時非向陝庫借撥巨款何以濟急已於文卿中丞函中言之矣瑪納斯南城負隅如故因前敵北路諸軍見獵心喜均爭克城之功致堅困獸之鬪戎機一滯遂致如斯老湘分十一營隊伍前往助其

攻堅亦未得手而古濟池西防營寥寥運道屢報車驟被劫金都
護餉事杳無音耗軍情極渙殊可爲憂也

答劉克庵

餉事據吉田信合計見存及借定各款約一百廿萬大約臘正尙
可過去惟宜節縮點綴多畱些許以備明春急需此外不能不指
望洋款惟雪巖處久無確耗未知究竟如何至蘭州省城華商只
宜畱爲急時商借地步不能求多亦可不急也楊正茂扣刻漁利
所部馬隊亦不中用亟宜裁撤另募土勇駐花馬池護鹽運請卽
決計行之尤成章所部已飭陳元萼接帶令交卸後赴省聽候查
辦想已遵照起程據雲階面稟此事從寬了結爲是想與陶正言

書牘卷十七

七

均稟知尊處矣統領營官營私漁利自當擇尤參辦惟弁勇動輒
聯名指控此風亦未可長軍中事體總宜預防流弊統領營官過
犯不可饒弁丁挾制噪索之漸尤不可啟想高明早有斟酌也童
沛春在此有混領糧料私賣情弊發覺後旋卽上緊清還出局弟
念係少年子弟未加深究如到蘭營求差使不可誤收近時湘中
子弟厭薄本業專務名利以游士爲生活其究乃爲刑戮之民可
勝浩歎李良穆已到肅治軍尙稱能事然亦非不好利者當時申
做以成全之代統宗岳全軍當遠勝范秉誠數日後卽下委今日
接金和甫報瑪納斯南城已於九月廿一日克復尙未接毅齋稟
報大約湘軍收回烏垣非休養旬月不可毅齋病雖痊復然嚴寒

臨陣非其所宜老湘全軍患疫者幾過一半勢非緩養不可而後
路轉運新糧甫經開辦駝隻車騾均形裹足急切不能取齊若卽
進兵則正值大雪封山冰凌凝結之時諸形棘手且無論築壘支
帳均不便利也弟意決俟明年春融進兵已與毅齋商之

與王蓴農

聞今歲湘中錢店倒帳克庵頗受其累而其太夫人所存贍資亦
難復問克庵此次復出爲弟分勞前訂每月致送八百金聞署中
用度浩繁常虞不給今復因倒帳受累其公私交迫不想可知弟
擬將署中各項薪水火食等款一切概由公出帳卽自弟出署日
起算免致克庵另籌庶每月八百金或資敷衍十月初九日爲其

書牘卷十七

七

太夫人八旬晉五大壽請代措銀千兩送呈克庵懇其代奉堂上
以博老人一笑本擬託若農觀察送致其家因恐其中或有不妥
是以徑致克庵希於晤談時道及此款應由弟廉項內劃出已另
致吉田觀察矣

答張朗齋

頃得金都護函牘瑪納斯南城已於九月廿一日克復首要多就
擒斬殊爲欣然原擬進規南路惟時屆冬令大雪封山師行非宜
又助攻各營回烏垣後須休息整理而古城所採新糧尙未發運
倉卒開拔慮多疏略不如明歲春融再進爲妥且毅齋大病甫愈
亦須將養已商之毅齋矣吐魯番產糧素多轄境伊拉里克水利

曾經林文忠修治記升科有案文忠談過南八城如一律照蘇松興修水利廣種稻田美利不減東南弟當時微詢崖略未暇致詳昨見毅齋稟內有亦拉里地名在吐魯番托克遜交界處或卽指此請畱心訪察爲要就近採買糧料節省運腳是行軍第一要務惟嚴禁騷擾軍民相安則糧料可採價不致貴又吐魯番旣下須於此安設糧料子藥轉運分局以備支應各軍一切宜早爲籌及希將地勢道路詳悉示知爲荷

答劉克庵

尤成章稟卸交陳元萼接帶令其速赴蘭州聽候察辦尊處免其深究自易了結此支及三起馬隊均袁筱塢所派蓋猶淮人之馴

書牘卷十七

吳

良者所部多桀驁之氣兩營官尙能戰而壓服之其吞蝕馬乾及短缺額數在所不免然究優於南馬隊尤成章又較武朝聘少勝也陳元萼雖是南人然在隴已久尙帶馬隊頗能戰弟已於其稟辭時詳告之大氏釐革夙弊事事從實而嚴禁士卒挾制預杜譁鬪之漸尤爲久遠之謀軍興旣久營私罔上之弊無所不有而短額數瞞截曠則幾成定例矣參辦雖其自取而事理未能畫一是考核宜嚴執法又有不能不稍寬者想高明自有酌度耳省城包修外郭工堅而費極節東北一隅明歲春融可望一律告蒧誠是盛舉昨已於司稟批示有十營之眾辦城工足資興築蘇有慶半營終須裁撤調剛毅一營填紮事非不可明春仍須請隨時酌辦

黃金福乃粵人中之最可用者所部均土著能戰而服號令似宜令仍帶原營將來即可收在附近營汛當兵尊意以爲何如吾湘士習囂陵秋闈尤甚非好消息自頃橫議四出終必釀禍是可憂耳瑪納斯南城旣復毅齋尙無書來想是隊伍遲收之故此間見正趕練馬隊礮隊仍飭中軍標兵百名前來補缺擬明正令中軍照前式募標兵五百名以實營伍爲將來漸次復額之計近看宋得祿所帶標兵及精騎標兵均精壯馴良而甘涼兩鎮送來標兵亦整齊可愛由此訓練成熟則千把外額之才不可勝用而營伍可期振作將來勇丁撤遣不致茫然

與張朗齋

書牘卷十七

五

師期自非俟明歲春融不可見飭古城局趕辦採運并飭官車三百輛運子藥軍裝大批赴哈密設局收儲官車放空過天山赴古城運新糧赴烏垣計一月之內可得兩轉有奇再調雇駝隻數千應之庶湘軍馬步二十餘營可免缺乏尊處運贖墩之糧尙只三十餘萬斤計只敷全軍半箇餘月之需亦宜趕緊灌運路遠節多非預爲謀之不可恐臨時周章斷來不及想蓋籌早有成竹也軍糧須隨地籌畫不能盡恃後路轉運古今皆同南路本是腴疆必有可籌之處明春進兵攻取托克遜後可成破竹之勢總要採買公平則糧料不缺師行可速復地愈多則軍糧愈易取辦矣

答胡雪巖

前得蘭署信知閣下所派李思經十月初八日自蘭啟程計數日當可到肅而尊函尙未得見不知商借洋款有無成說殊深懸盼廿五夜接鄂臺陝局排遞尊函未註發信月日閱悉是復弟八月初三日奉詢之件一切詳細分明傾倒之至茲條復於後

普借以俄方有事印度應俄無以應我自應作罷論美借約十一月內回信然向來未與中國通財尙未足靠

普商出借日商實銀尊意疑日本國小向未聞有巨商恐難作靠此係實情弟意普商或本有巨款願借不肯張揚故架名日商圖掩其迹亦未可知計此信到時已有分曉如可借則借但不與臺事相干致滋異時鞦韆爲要

書牘卷十七

五

麗如怡和兩行聞多係英商出本弟前因威妥瑪阻我借款遂決意不與英商通融茲兩行既自來兜攬并告知威妥瑪爲國議不容撤回本國與從前事勢不同且威妥瑪近有代安集延求降之議其狂態亦頓斂矣尊意以長年八釐半定兩行之息添作按月八釐半由泰來行包認仙令更覺周妥

來函以或貸二行或貸日商應由弟處察定速復反復籌思自應卽此兩貸定議只看其可靠而先成者爲定可耳相距太遠一函往返動須數月弟若預爲定見恐事機或不相值翻添鞦韆致有延誤不如由尊處酌定飛函告知弟再具奏尙爲簡當也想高明必以爲然

借款五百萬兩分作五年歸還本息浙粵兩關及江漢一關每年承認不過卅餘萬兩力所優爲然必明年收借款之日起息光緒四年夏按年還款始免迫促浙粵兩關應卽札交尊處催收歸款江漢應卽札交若農催收歸款庶屆期不致迫促希卽酌定并與若農函訂以免參差罰銀卽照辦

洋款未定借之先須籌借華商各款備年底明春之需俟洋款按批還款已與克庵太僕吉田若農兩觀察函商矣

與劉克庵

廿五夜得胡雪巖復函知借洋款已有眉目其冬臘明春籌借華商款項亦有成數甚爲慰意已一一復之原稿鈔覽據雪巖信威

書牘卷十七

三

妥瑪與中國爭執國議非之因其生此波折致英商生意停歇湖絲陡長英商翻以重息拆貸華商大爲失本見在威妥瑪已經撤回本國而麗如怡和兩行自來兜攬憑訴威妥瑪之貽害都由華員之愆憑是誤英商者英使威妥瑪而誤威妥瑪者華員也總署書來言及威妥瑪於九月廿一日回國郭筠仙於九月廿五日出都大約於此底裏亦明白幾分矣雪巖又言俄英爭印度英欲護其腴疆但知土耳其而不知安集延之坩土耳其又不知土耳其之卽印度也所稱俄與普聯普卽布洛英與法聯法卽法蘭西情形均合有來泰西各國爭城爭地兵端已起此後洋款必少出借者如果中國各省關眞能有無相通則及此閒暇盡心料理亦未嘗無可

著手惜明人不可得見而憤憤者太多也

答劉克庵

洋款定借弟已復知雪巖據其來信頗以麗如怡和兩行自來兜攬普人秦來承認仙令爲宜弟屬其自行酌定一面飛函告知具奏蓋未經定局之先商情多變一經出奏便多窒礙相距太遠不能預度也雪巖與諸洋商素協承辦採運有年向無違誤遇有託辦必盡心相助此次成借自須其一手經理能成則明年乃有望至本年冬臘及明春用款不能不向華商借貸以備供支而洋款須首夏到隴初批次批亦須分還華款春季用度宜加意撙節勻出首夏出款庶免拮据此閒亦擬如此辦採糧價值須付見銀

書牘卷十七

五

腳價隨時清給此外可節省挪騰之處必當加意也所盼明歲春融下兵南路戎機順利所至有糧料可採則節省勞費爲多只愁軍餉軍裝軍火及辦理善後屯墾事宜力猶可及耳馮鎮清改土勇爲節餉計自可照辦彼處只防游勇出沒無須客軍楊正茂旣撤劉正高暫緩具見精心弟見練馬隊五百騎人馬嫻習制兵取本標甘提涼鎮所挑者居十之八勇丁則各隊長舊人不過十之二意在強兵以規久遠不欲多收勇丁將來勇撤兵畱不至茫然而將弁之才亦出於此隴之軍制騎與步相參馬兵居三之一向來稱強者以此鄙意不欲挑勇將來劉正高議撤所有勇丁擬不調取惟好馬與口鞍尙不嫌多也

答劉毅齋

許久未接尊處函牘正深焦灼頃接九月廿一日瑪納斯南城克復之報知詳實情形適成守達瀛等由烏垣前來引詢一切知清恙已就痊可漸可復元尤深欣慰以見在事勢言之綏來肅清北路無賊從此下兵南路可免牽掣之虞雄旆自北而南哈密張軍自東而西巴古之閒蜀軍自東北而西南合勢併規自可取破竹之勢惟合天時人事而策萬全之效則有不能倉卒圖之者塞外天氣祁寒十月大雪封山冰凌凝沍師行非宜車馱轉挽不易駝隻雖便負載無多一踰天山卽需築壘安營日事角逐而地已合凍人力難施一也古城九營存糧尙未運竣新採之糧雖云可得

書牘卷十七

三

三萬石而丁道來稟卻無定說近且并牛籽之數合言三萬是採買足數尙未可定而由古運烏一月只能兩轉半所留之車陸續損壞逃棄不足二百輛雖將行營車駝隊騾悉數赴古裝運爲數亦屬無多見飭巴局扣畱歸包運糧駝隻赴古運烏尙未據報如何辦理又挑派肅局三套車三百輛并飭巴局派官駝二千赴古助運約抵古起運當在臘月運竣或在明正及仲春此外別無縮地之法最可患者由巴古抵烏嘗有逆賊伺劫以致官民車駝時有戒心卽文報亦多梗阻數月以來爲此耽憂久矣金和甫軍情渙散奏委之錫領隊支飾離奇所有零星殘隊不但不足恃并恐壞事我處各防營不能得力迎護隊伍於防運外不能窮追是後

路運道隱憂方大而目前之轉饋艱阻尙其小焉者也此時而言
圖南亦只空言難責實效愚意師期斷非明歲春融不可見於官
車三百輛赴古城助運之便解軍裝子藥卸之哈密放空過天山
俟古城新糧運竣大軍由烏垣進達坂所有官車駝當一併東歸
以備瞭臺關展吐魯番運道之用庶大軍所取較便而後路轉饋
勞費亦省數百千里程途也惟征軍隨地取糧斷無全恃數千里
轉饋之事來書所稱亦拉里當卽伊拉里克憶三十年前弟曾與
林文忠公談及西域時務文忠言西域屯政不修地利未盡以致
沃饒之區不能富強言及道光十九年洋務遣戍時曾於伊拉里
克及各城辦理屯務大興水利功未告戡已經伊犁布將軍彥泰

書牘卷十七

五

奏增賦額廿餘萬兩而已旋蒙 恩旨入關頗以未竟其事爲恨
是南疆素稱產糧富庶勝於北路之證也師行所至幸畱意焉揣
度賊勢以托克遜爲喫重固須全力注此然帕夏自守虜耳見井
央威妥瑪求降其無遠謀可知白余諸逆狡猾成性其必伺閒窺
擾固在意中非就地殲除必仍不靖能偪其併聚一處杜其旁窺
庶期悉數殲除大抵進兵南路又是緩進急戰之局非俟春融後
路運道不清轉運不能戴役麾下及所部將士將養未能復元各
軍布置未妥迫促從事殊非萬全之策迨春融則諸務從容就理
鼓行而前氣足神完風馳雷掣廓清可期而勞費亦省矣想高明
必以爲然卓勝冬至後始能拔行臘底春初可到愚見因金軍太

不足恃欲以此爲後勁將來南路填防需人實邊非能戰而忘家者不可此軍耐勞苦而又可耐久於時局相宜也餘於公牘中詳之

與胡雪巖

十月廿七日一函奉復由排單六百里發遞慮其遲延又錄稿排遞鄂臺請若農馳遞計兩處函件總有一件先達台覽以便尊處核酌迅速定議廿九日李思經到肅又接閣下前次寄函一切具悉所欲復者廿七日函中已悉陳之矣惟尊函所言借款五百萬十年歸還弟函復時誤爲分作五年歸還本息蓋由廿七日函復時尚未接李思經所齎之件也既訂十年歸還本息則佔去見餉

書牘卷十七

美

更少應卽照尊議成借至桐雲於閣下尙無違言幼丹於桐雲亦非十分浹洽縱桐雲有言亦未必信也幼丹於弟向稱契洽此次變相實非意料所及渠前撫江時因爭餉與曾相忤此次又與弟失歡此君素性使然亦無足怪見在不由其成借可省無數唇舌惟盼其能支拄東南裨益時局是爲大幸弟亦不以此介懷矣

與沈吉田

前因訓練精騎需用口鞍屬喜副都統於歸化購辦上等馬鞍五百盤并配齊一切茲據覆稱一時難以購齊請仍於關內各處採辦查西安駐防八旗舊存口外鞍板鐵鐙頗多應可多購惟旗下情性不同向其通融每多阻執或姑以不堪配用之物抵塞徒煩

挑換而西安市肆中物又斷不適用查馬隊所需以口鞍爲上者以製作合式非內地工匠所能鞍板好者料整而堅安之馬背任人左右上下無少傾側鑿之好者重而不笨能容靴而不窒靴旂庫存畱從前舊物頗多合用請於無意中探詢實有若干可以通融出購如能多購固佳否則一二百盤亦够至須酌用各件則市肆中購之可耳

答劉克庵

尊處每月七百兩實不足用以弟所處情狀言之每年廉金不敷用度若將軍中幕友僚佐及應酬一切一併在廉項支銷不但不足且必賠墊重款前函致尊農請公處幕俸用度概由公中支給不但情理應如此辦軍務應有薪水辦公亦照例之事也乞勿過執呈奉太夫人壽敬旣承允納百金亦不敢再瀆惟祝歲歲稱觴每以微儀得博堂上一笑卽至幸也

上總理各國事務衙門

十月初五二十四兩奉鈞復謹領一切告示條款比已飭司刊發用席片板片徧行懸挂曉示誠如尊諭不值以此資其口實也惟由青海進藏中隔草地向爲各土番伏路伺劫之所商旅罕出其途平時藏差往返皆取道四川不復借徑青海者以此被人查知情形當變計不復由此如必欲由青海通藏則草地向無官司未安驛站野番不識禁令不能由內地遣人防護聽客所爲我固有

詞矣已與豫大臣師商之近時俄英爲爭印度均思赴藏察探西
通印度路徑實則商販偶或經由從無由此過兵者非若臺灣緬
甸均有水路可通致力較易也且俟其來再看光景近得滬局來
信英商怨威妥瑪無理取鬧撓其生計今年湖絲一項因收購失
時重息向華商貸本躉買尤多虧折國主將威妥瑪撤回以此赫
德笑威妥瑪沒臉且言威之吃虧亦由被人慫恿所致也

與劉克庵

沈漢卿致尊農信自非無因瑪納斯南城

首逆安得璘一家倡亂於此

原有西

河營皆西甯河州逆回逃去在彼聚居者最稱悍驚湘軍所勦卽
此股其逆目韓刑膿海宴等皆已伏誅

安得璘尸亦被戮

逆黨均已就戮

書牘卷十七

亥

當烏垣各城克復時白彥虎余小虎及甘回頭目馬人得等均已
飛促瑪納斯各踞逆回同竄南路因騾馬少而家累重不能成行
黑保財乃率其黨先竄求救於安集延夷酋帕夏帕夏答以後路
被俄羅斯侵擾不能來援辭之求救於白余諸逆白余諸逆給以
卽援應而卒不至韓刑膿海宴所以忍死穩抗官軍而究受屠戮
之慘者以此沈漢卿所聞必係西河營賊眾有漏出求救者若使
知瑪納斯南城已克西河營已擒斬無遺自將冰消瓦解永無反
側矣見將此段情由行知西甯鎮道及河州鎮令其出示曉諭只
說如瑪納斯逆眾竄回原土准各百家什家長稟知地方官一律
安插免其治罪方不著痕迹實則賊中一兩人送信歸家容或有

之若大眾得返西河決無是事緣肅州玉門青頭山設卡盤詰頗嚴不能插翅飛過也

答劉蔭渠

承示楊雲階願賦同袍如處空谷而聞足音欣幸之至惟弟自入關度隴困苦不堪軍餉積欠至今已二千八百餘萬任是掀天揭地手段亦苦無從說起況又代前任籌墊數百萬見又代關外諸軍籌墊餉糧尅弱衰軀負重日趨百里所不慮填溝壑者苦厄宿孽未了耳豈是別有點化神通雲階棄繻之請或是未悉弟處况味疑猶昔日西征豪舉不知帝華瓶罄無以款客也與公同處窘鄉所有艱難苦恨情形亦無須贅說請卽轉述一切敬謝不敏

書牘卷十七

五

與金和甫

餉事艱窘至極各省協解遲延卽譚中丞奏代借華款一說亦未有應者尊處情形已據實代陳能否仰邀 鑒諒則未敢知請

敕撥部款弟處從來并未籌及特以時勢所值不得不然未知能邀 俞允否餉源涸極自應及早切實整理減汰歸併事不宜遲以弟所聞則歸併後所餘亦復無多況開屯實邊本古今要策巴古今歲已著成效人所樂趨若及時興辦以之處置減汰之軍不但無冗食之損且收其益高明當以爲然瑪納斯南城克復已會列台銜具奏其中如額藹堂錫子猷之應從緩敘已附片陳之外酌減數員亦非無所見也榮潤庭赴都英西林署都護 廷意

似以進規南路爲急伊犁爲緩惟瑪納斯南城克復已值大雪封山進兵之期不能不俟明歲春融也

答譚文卿

紙人剪辮之事蓋訛言所致蕭朝翥在漢口悔教後不見蹤迹今春到肅捕得游僧提營親訊自供爲蕭朝柱乃蕭朝翥之徒湖北人曾沅浦撫鄂時購得之給以頂帶令其巡緝游匪後不通音信伊至甘始削髮爲僧曾在崆峒山挂單去冬始來肅募化徧搜行李無詭異字據惟攜有緣簿閱係募修峩眉山廟宇者乃重責三千梟示肅州西門完事安徽獲犯所供蕭朝翥祝髮西行當卽指此耳至九龍山在閩之汀連一帶山谷幽邃向爲藏奸之所與粵

書牘卷十七

李

之狗頭山同弟在閩時曾飭嚴密搜捕山中并無廟宇土人除紙棚木廠別無村落不解外間匪人何以指爲嘯聚之所大抵指九龍爲名者非閩人指狗頭爲名者非粵人亦猶海上三山空中樓閣耳昨得黃芑巖書言夏秋搜捕游匪徧歷各處一無所見惟在湖州擒獲數匪解辦亦非剪辮案內之犯卽此可見其大概矣政事修明庠序日盛人知悅學邪慝自銷正本清源道無過此

答劉毅齋

載展來牘具見籌畫詳慎與鄙衷所存者一一脗合快慰殊深卓勝軍擬於冬至後分起西行而購駝製帳不能咄嗟立辦

大約明正始能

到比至春融則天時人事罄無不宜雄麾南指可免牽掣矣白余

諸逆敗蹙之餘何能爲患帕夏西迫於俄東爲大軍所逼不知計所從出如果仍懷兩端而堅踞托克遜則勿可斬而組可繫也所欲言者已於牘尾詳之意所未盡復條繫左方

和甫爲人只知居功不能作事

亦實因餉不應手之故

見授伊犁將軍并

諭以自酌進止蓋急南八城而緩伊犁之局弟前奏優敘和甫於所保各武職無一字增刪惟核減孔才桂錫楨周先檀數人而已該軍四十餘營以實數計恐難滿一半每月餉數以廿二萬兩計今歲所得不過五六十萬兩若非我處墊給軍糧五六百萬斤則早撒手矣昨疏請歸併馬步廿營協解之款以實解一半計而懇恩先撥部款四十萬未知得邀俯允否然弟所得爲者止此耳

書牘卷十七

空

烏魯木齊都統 敕前兩廣總督英翰署理到任當在明春西事局勢一新幸南路尙是一手經理可以次第展布不患牽掣以兵事言之吐魯番受制安酋非其本意兵到歸順自在意中達坂賊擊敗必速退托克遜帕夏注意於此賊數頗多非全力兜剿不可如將此逆了卻或以辦金積之法辦之則戴事可速白余狡詐似宜先圖之我勦此賊安集延必不助勢我若先攻安集延白余諸逆或又乘隙逃走不可不慮也猛打數仗白余與帕夏或有互相猜忌之釁從而乘之更易爲力英人用計欲庇安酋爲其外蔽而離我與俄人之交弟前復總署信總署比照致威妥瑪威妥瑪必由電信寄知帕夏帕夏如遣人到尊處可隨宜應之照弟前函所

商辦法料理勿斬來人如或英人來營插嘴亦只如此我圖復舊疆與伊有何干涉婉詞卻之可矣俄英因爭印度構兵據上海局信似一時未能歇手不似從前旋戰旋和也威妥瑪因與中國爭執太過國主慮其攬壞和局撤其歸國數年內洋防自無他事誠能及時振作何難轉弱爲強乎

南八城回民懦弱成性遭亂以後尤懷 朝廷深仁厚澤必不甘自外生成進規南路應勦者陝甘叛回安集延夷兵耳積年叛弁耳此外纏回及先坵賊而後反正者均應寬貸亦天理人情所宜所部各營均知法度老湘風氣尤冠一時此次如能各遵行軍五禁嚴禁殺掠奸淫則八城回民如去虎口而投慈母之懷不但此

書牘卷十七

壹

時易以成功卽後此長治久安亦基於此從前 陛辭時晤奕公

山談及回疆往事奕云只要文武各官都肯以平民待回不以牛

羊視之則回永不叛其言殊有味也惟軍糧一事必須在該處採

取照價平買自順輿情自古以來無數千里外轉饋軍糧之事非

但糜費應節且師難宿飽最滯戎機亦拉里卽伊拉里克昨得張

朗齋信詢之闢展降人亦稱水地產糧托克遜賊糧卽取給於此

此外產糧之所聞冬麥亦多當自不乏進兵時秋毫無犯居民安堵庶

採糧容易運價可省而善後又易辦公家之利也托克遜得手其

餘富庶各城堡必有儲蓄只打眞賊不擾平民不愁乏食大軍攻

克托克遜則運道文報當由哈密達吐魯番已與朗齋商之將來

文報由此安設馬步撥運局由此安設分卡茶可出口棉可進口亦餉源一助也餉事見因協款不旺年關逼近又商借華商銀一百廿萬備冬臘明春之用明年不能不借洋款已與滬局商及或可有成能於四五月齊到則事體尙從容也然合陝甘及新疆萬餘里版圖無可恃的餉徒盼協款借款度日何可爲常將來腴疆克復當講農田水利畜牧通商以規久遠耳

上總理各國事務衙門

同治十一年十月俄商在石河被劫一案前奉鈞諭查明實在情形議結比卽飭總統劉道遵照詳加訪察一面調徐學功等赴營向其詰詢嗣因大軍由阜康埽盪而前連復數城只瑪納斯南城

書牘卷十七

奎

土回尙稽 天討徐學功正帶勇助剿未能赴營劉錦棠分所部會攻瑪納斯南城時委員丁鶚就近赴石河密查俄商被劫情形據附近居民及在營勇丁僉稱當時賊首妥姓句煽各處土回肆行劫殺北路商販遇之鮮得免者沙山五岔一帶地當賊巢之北徐學功練團保衛地方屢次打仗獲勝所得賊物均分給戶民從未入己我等村堡相聯路徑熟悉每遇賊搶掠歸巢伏路突出奪取均分由團首句派亦常有之事十一年十月忽有一起商人到北路適遇妥逆黨夥領往賊巢我等報知徐學功一面派人去截黑夜未能瞭望明白頭起商貨被賊領路過去次早仍伏路等候將所有商貨奪回均分并傷有人口是實詢之徐學功所言亦同

比瑪納斯南城續行攻克踞逆盡殲妥得磷屍骸亦經掘出戮梟
該逆親屬早已淨盡無可查訊茲據劉道錦棠轉稟前來案懸數
載應卽議結竊查逆首妥得磷本河州妥家岡人早以新教煽惑
口外回部北路各城之變皆此賊爲之自與安集延戰敗後徙居
瑪納斯南城以土回多由西甯河州從前遷出族類多其舊日親
串也昨譚鎮拔萃會攻瑪納斯南城常與接仗之西河賊營蓋卽
妥逆死黨妥逆狡詐異常其黨夥信其指喉無所不至此次俄商
被劫由其哄騙所致觀俄商柔子所供瑪納斯妥阿訇之子帶人
迎接遂貿然隨行而疑團眾爲搶劫異國商民祇知買遷獲利其
於中國民人孰順孰逆驟難分曉亦容有之徐學功團練保衛地

書牘卷十七

寄

方志在斷賊接濟遇賊出掠輒伏路截奪以所得賊物勻給各貧
戶本是常事此次俄商被妥逆派人領路護貨入巢行過石河團
民誤爲甘心濟賊事出有因景大臣榮署將軍均以俄商貨物被
回逆搶去事後方能根究原擬爲徐學功鳴槍奪之免而又爲俄
商洗濟賊之實用心幹旋期於兼顧無如瑪納斯南城旣復妥逆
早伏冥誅其親屬死黨立予殲滅并無子遺無可訊詰是此案擬
結無期而俄商失去貨物成本終歸無著也宗棠前以綏來北面
荒絕地畝甚多飭徐學功仿照古城巴里坤辦法廣開屯田許給
農器籽種牛隻經費銀二萬兩見在南城克復附近腴地甚多西
河五岔團民已分往認墾所需經費銀兩除已發一萬兩當交徐

學功領去外尙存一萬兩未發擬飭劉錦棠傳知徐學功曉示各團眾停止給領卽以此款一萬兩備歸還俄商石河搶失成本及命費了此久懸未結之案應否如斯伏乞鈞度如以爲可希卽知照俄使速將此項銀兩交付何處何人收領以便向取收條備案與劉克庵

方伯書來述尊意擬以喻丞光容署河州王鎮塘署狄道所遺靈州之缺飭孫承弼回任平涼委余澤春本可照辦惟愚見狄道新安漢回甚多喻丞久於其任官民尙期相安此時似以仍舊爲是河州卽以王鎮塘調署當可稱職平涼委余澤春魏道必以爲然人亦去得惟孫承弼回靈州本任雖是正辦而望其安靜無爲與

書牘卷十七

奎

民相安恐有難信須屬方伯常畱意察之爲要我輩鑑空衡平本無成見總要見宰官身者知自愛永保令名地方并受其福耳河狄同時并換局勢似欠慎密積亂之區不得不過爲之慮想高明當以爲然芋生補肅當可勝任此缺爲從前繁盛之地見雖不佳將來或有漸復之望芋生手筆近闊將來能免負累則幸矣蔭庭以階州處之當無不合部覆雖未到顧子超斷無回任之理段吏目貪狡已極請飭滌泉嚴究之首府縣都是寬平路數恐不免失之輕縱滌泉於公事頗多積壓不知近時病體何如也乞於府縣衙參時面屬之冬晴雖好然無雪則爲災異初壇不得雪惟天山則已見白次壇已是兩日尙止零星點綴并無分寸如何如何

與劉毅齋

俄商被劫一案景大臣榮將軍金和甫諸公皆欲爲徐學功出脫而又不欲以濟賊加之俄商致俄使在京屢以此向總署饒舌尊處稟牘亦未能明白指實弟昨復總署一函似俄使無從置喙飭鈔稿寄覽可照換一稟備案凡與西人論事總要先將條款看明白占地步乃與爭辯我持論既正不妨切直示知而又稍畱餘地俾其有機可轉自無不了之事若一意隨和彼自謂得計反滋論端矣外人情性欺弱畏強喜直忌曲我真自強彼已心折我只率直彼亦心說而服之矣賢者聲績日高擢用必速異日當知斯言不謬也徐萬福疏防違令專欲赴前敵以就功名殊不可稍子假

書牘卷十七

美

藉已於牘尾大批嚴飭并鈔批行知矣

與劉克庵

烏提中營參將尊意擬以提督銜記名總兵葉占魁借補涼州中營遊擊擬以記名總兵鍾鎮南借補弟於接到公文後卽飭檢查該兩員履歷行營未及帶來而於兩員堪勝與否記憶不清未及奉復近苦健忘日甚遇事過後便忘致稽延許久甚爲歉然乞飭檢查葉占魁鍾鎮南履歷見示沈漢卿所稱河州民心不靖由漢回各造謠言所致大約必可無事妥得璘本河州著名首逆煽惑之人多係西河出關之願從新教者與馬四馬桂源兄弟馬化濫等互相首尾其兇燄與尋常賊眾不同夜中恍惚兵聲當是劫滿

之徵馬化澹隻身赴營之夜弟時在平涼聞對河有聲沸起如千
萬人哀呼叫號之慘羣疑萬狼齊嗥前年肅州城復後拘執羣兇
訊明斬磔先夕大營左右有聲夜作亦如之足見忠魂毅魄足壯
山河卽兇氣惡煞亦必有所憑依始能爲厲其理固同也見在白
余兩逆所部陝甘回賊尙不下數千毅齋帶去旌善馬隊雖肯盡
力而引出就撫者極少恐將來仍歸浩劫得非數爲之耶標軍百
名昨日到營已交宋得祿分撥位置惟聞其中頗有吸煙者數名
已飭畱心察驗乞諭尙署中協添募新軍時加意稽核勿少草率
至要至要徐翰藻本是猾吏周受三曾言其不可用故數年置之
高閣方伯與前臬楊慶伯屢爲言之弟不爲動今代西和簾缺仍

書牘卷十七

奎

然作惡可知饑貓之性未改其妾毒殘婢女斃命尤屬奇慘請飭
首府嚴訊重辦勿稍含糊民婦陳王氏控姜倅竊其衣物已屬奇
談而併及腳帶則奇之又奇矣賈令受其詞已奇用拘票將姜倅
收管則奇之又奇吏事如此亂未已也簾缺代理無不搜括席卷
而去今歲尤甚甯朔賀令亦言被代理者嚴比錢糧九百餘兩攜
之徑去并不一面亦一奇也田連考人尙樸直亦能戰秦州遊擊
部覆到請飭赴任羅瑞秋移紮高臺亦好請於明正下札

上總理各國事務衙門

接奉十一月十五日鈞函得悉日本使臣森有禮到署稱見派委
員許姓在上海向外國洋行借銀七百萬兩比經尊處當面駁斥

森使旋來署面遞委員名條稱本領事官同其辦理借洋款事務殊深詫異竊宗棠前以軍餉僅敷至十月而協款稀到卽譚中丞請由各省代借華商銀陝甘認息一節亦恐無應者是明年借用洋款一著萬不可已而目前餉源已涸不能不早爲之所因令滬鄂陝各局速借華商巨款暫應急需俟借洋款有成分批撥還華款一面函致滬局與洋行議商大概定於明年成借庶期足資接濟十月廿五日接胡道光埔稟籌借辦法稍有眉目請酌定遵行宗棠以相距太遠仍屬其自爲酌度俾免歧誤察胡道意頗以麗如怡和兩銀行向曾承借無誤此次兩行主自來兜攬并言威妥瑪阻借非該商等本意似可允行而又以宗棠前函屬以不問英

書牘卷十七

六

商爲是該兩行雖各國均有成本在內究係英商居多慮宗棠或有挑駁也至普商承借其銀實出自日商一節胡道疑日本國小富商無多未必足恃宗棠頗疑銀本普商所有特以旣辭俄人向借近聞已允俄借巨款未便與我成借不得不架名曰商耳已一一復知胡

道總以款項足恃而先成交者爲定不拘何國何人擬俟胡道續稟事有成說再分別奏咨定局謹先將胡道原稟呈覽仍希發回備案至許厚如之係江蘇補用道與否曾在金和甫處充當委員與否宗棠實無聞見無從懸揣適安肅史道及金和甫駐肅委員得敦楊晶等衙參之期將此段情形告知并詢其是否認識許厚如據稱金將軍前在肅州時袁筱塢侍郎曾有書信薦過許道赴

金軍投效將軍派其催餉餘事不知宗棠於前數日見古城局稟報報差官党吉祥在昌吉見金將軍蒙將軍示及見訂買俄商糧千萬斤每百斤價銀四兩約至明年由湖北匯兌竊以此款需銀四十萬兩和甫既指湖北匯兌必係有著之款而湖北未聞金軍存有的餉或卽指許厚如冒借日商之款而言擬日開函詢和甫乃得悉其巖略宗棠之擬借洋款原以五百萬金爲度今森有禮所稱許厚如與日領事借數多二百萬兩或由和甫屬許厚如探知洋款經胡道商辦稍有眉目遂思乘機冒名坴借亦未可知不思籌借洋款須由海關出票督撫加印又必有的餉可指屆期還款乃可定局事前層折既多事後關係非小儻有差謬匪特不能

書牘卷十七

堯

成借并慮事涉外洋易滋議論也和甫陰柔成性喜用挾智任數之人與之共事有年仍是兩不相喻其居心積慮惟恐小處不能見長而已隨宜處置當可不致失懽若望其黽勉同心受直諒之益竊恐終有未能耳許厚如事請卽由尊處諭知森有禮并無委令辦理借用洋款之說事由外辦定局後外間自有奏咨到來此時不能代爲主張也許厚如藉端招搖任其盤踞滬上慮其別滋事端應請嚴查杜累近時藉洋務藏身取便私圖者多非嚴察而去其太甚不能挽此頽風伏祈鈞度及之

與伊犁將軍金和甫

餉事艱難至極源涸流枯各省關從前尙有於號呼迫切之餘勉

強點綴以應急需者茲則悍然不顧矣察看各省關情形亦實有自顧不遑艱於籌措者任部議嚴催終亦罔濟是餉源無可復濬斷非減兵就餉不可弟前疏所陳已奉 恩准部款撥二十萬兩此後尊部作馬步廿營實數扣算或可望飽騰其空缺之營哨各官願歸家及願歸標者資遣之費可從厚發給其願就口外安家開墾者卽將資遣之資置買牛籽耕具如古濟辦法當亦所樂爲與其冗雜無著不如及早料理之爲愈也想高明必以爲然竊計裁併成營應汰減之勇丁當亦無多而餉雖減少卻是實數兵雖減少卻是精兵麾下可省無數煩惱矣望卽毅然行之至進規南路毅齋朗齋崑山兵力尙資敷布尊部旣減併成軍則布置後路

書牘卷十七

七

以重形勢俾前敵得一意馳驅而運道文報可無梗阻於大局實大有裨益亦足慰公忠偉抱矣昨得來函所言南路情形諸形艱苦已屬毅齋預爲之所大約後路籌糧籌運總難歇手耳日前接奉總署來信詢及借用洋款一事日本使臣森有禮面稱弟處委員許道厚如有向借七百萬兩之事總署當卽駁斥以弟處向借洋款係由胡道經手并無另有委員且借洋款必須分別咨奏然後定議成交亦未見陝甘總督文書到京森有禮旋到署遞許道名條稱係尊處委員總署信則以江蘇候補道許厚如本係長隨捐道曾被參奏有案意似不應濫用閱悉之下殊甚茫然適史道晤談據稱聞袁筱塢曾薦許厚如赴麾下差委大約卽係其人弟

處原屬胡雪巖明年辦借五百萬見在今年冬臘及明春之餉則專以重息借華商之款待洋款有成分批劃還見尙未接胡道回信也日使所言殊不足信

答楊石泉中丞

秋閒奉惠書知清恙漸痊卽擬銷假具仰公忠偉抱佩慰何言惟爲臣不易進不如退素懷略同而值此時艱卻又有難言者閣下與克庵及弟所處正同不足爲外人道也餘杭案仍無分曉殊不可解言者每以道光初奉 旨平反趙二姑爲比似兼於庶獄亦朝政所宜不知彼當承平無事之時 聖意以各省督撫養尊處優不親細務特欲於題本中指摘一二件以示儆戒若如見時光

書牘卷十七

三

景必不屑屑於此且弟前赴燕齊勦捻路過趙城見一低小牌坊卽趙二姑奉 旌所建前人猶指謂妓坊也然則當時埒和成獄者亦獨何心哉威妥瑪藉滇案興波作浪聞亦爲華員所使實則威酋意興早已索然無如過持息事之說者必欲遷就結案屈意奉之見已爲其國所詆撤回本國去時尙於樞邸處懇淮安集延之降意在芑安集延以與俄爭印度幸樞邸以此事有人主持卻之此虜伎倆大率欺輒怕惡者耳其實英人亦不欲與中國肇衅觀從前之撤巴嘎禮此次之撤威妥瑪皆因惡其多事可知況此次正與俄爭佔印度尙有求於我也惜孱禽爲急弦所下不能掙紮片時豈不可歎浙中紙人剪辮之謠來自吳中東南幾徧秋閒

山陝亦有之此則詩所謂民之訛言也道光初元長沙城中亦有此謠并有雞生四翼五爪之說弟時年甫十齡每聞人語藉藉心輒疑之睡醒輒自摩其頂知吾髮無恙乃復安眠曉行市廛空處見家雞狼藉殆徧行人相戒勿近詢知雞啄人卽斃也擾攘旬月始獲安息後與故老談知雞禍古有之紙人剪髮則訛言耳大氏治平之世政教休明正氣伸則陰慝不作災眚自少反是則否陝西亦間有此謠雖捕治游勇哥匪塞其咎然無確然左驗也今其風已熄隴中則尙無所聞惟異端邪教如齋匪等類萌孽尙多已張示查禁幸此間民情樸儉不如東南陷溺最易耳西事因分軍助攻瑪納斯南城致稽時日進規南路必待春融由吐魯番進節節攻勦越二千餘里乃抵阿克蘇爲昔討張格爾時將軍參贊駐節處再西則南四城長文襄楊忠武立功處也衰朽餘生不堪重寄亦惟有慎以圖之而已承公忠之誼數年大批旺解拯我飢軍誠每飯不敢忘衛靜瀾方伯舊於胡文忠幕中識之古君子也與公相處何樂如之再前承垂念弟所處艱窘異常損廉泉萬兩以償債負古道高風非復近時所有本擬具奏以爲報銷地步又念公之去畱尙在未定恐一時卽賦遂初兩袖清風無以娛老故飭所司仍封存以待見在餘杭一案雖未卽結而公已力疾視事此款未可終懸自應入告應否獎敘何人煩卽示知以便照敘

答浙江提督黃芑巖

月前得惠函知浙中風謠漸定台旆所至靜謐如恆足徵威福之盛良用欣慰湖州積匪裘二既獲洵足銷患未形想兩浙可永保無事矣東南正辦洋防實則泰西各國均無肇衅之意祇因示弱太過致外侮頻仍 國勢難振而財用虛耗日甚將有不堪覆按者若如浙江之靜鎮而有條理豈有此患哉西事之壞雖由兵冗餉絀亦由經理無人主兵者例是豐鎬舊家不獨兵事吏事非所素諳而執袴積習既深除爭功營私外別無伎倆以故局勢日非內患未除強鄰且從而環伺烏垣數城克復而後機勢頓轉從此下兵南路可取席捲之勢見居大雪封山不能前進俟春融再整旆而南耳弟衰態日增勢難戀棧只盼吐魯番南入城戡定便可抽簪所歎替人難得欲罷不能則無如何也劉昌選飭帶甯夏土勇營當期勝任隴中軍務自克帥助理以來益覺整飭所省虛糜之費頗多殊爲慰慰惟貪詐之徒不免觖望耳

與王若農

頃接總署信知有日本森有禮來署面稱弟有委員江蘇候補道許厚如與日本局員商借日款七百萬之事殊深詫異查許厚如係袁筱塢薦金和甫當委員和甫委赴江南催餉者其道員係由長隨上捐荒唐可想此次與日本議借七百萬大約出和甫之意聞弟議借洋款五百萬欲附借二百萬抑竟係此人自出主意亦未可知弟已將與雪巖議借大概情形告知并將雪巖原來稟件

并寄總署俾總署了然於心不致攪局總署信飭鈔寄閱或由尊處轉寄雪巖一閱亦可唯屬雪巖不可爲外人道也

與湖廣總督李小泉制軍

閱邸鈔知公仍莅舊疆兩湖父老喜見顏色叨忝州民尤爲欣躍計受事有日矣滇案持平辦理足令異類息喙廷議有所據依前於沅浦中丞處見公寄書知用心良苦深爲時局幸威妥瑪因其國論不協撤令回國鷹化爲鳩自此海上議論當可稍息只盼此後措置咸宜厖也可使無吠矣俄英因爭印度構兵彼此均用全力似其事非能速了尊處想已聞其詳新聞紙申報則眞贗錯雜不足按也茲有啟者若農觀察之爲人公所深知昔昔幕湘若

書牘卷十七

高

農卽爲軍需提調共事有年出山以後奏請經理糧臺綜覈精嚴無傷忠厚敝部之頗得人和雖餉需奇絀未嘗譟索者譬此君之功見總鄂臺兼攬滬陝隴各局之全倚賴尤重而一官匏繫未卽眞除鄙懷竊以樞臺重寄鄂處中權一時覓替實難儻天假之緣服官鄂渚庶期兼顧事關隔省雖曾據實上聞終嫌越俎如蒙鑒及微忱於所屬請補一缺若農必不負公所知於鄂事可冀得人而於西事實多裨助伏求畱意幸甚

與劉克庵

前得毅齋十月來稟謂該軍病故傷亡缺額須募補千人比以從新湊集不若已練之軍爲勝擬由駐省十一營內挑派兩營出關

於牘尾示之茲據派總兵張俊入關募本地勇丁三營而令李克常潘長青募湘勇一營以資拆補張俊之英勇沈毅本所深知三營交其督帶洵堪勝任以本地將領御本地勇丁不但此時征戰可期得力卽將來平定更可資實邊惟李克常等雖准其赴甘涼蘭州一帶募投營湘勇一營竊慮難於集事該鎮等抵省祈兄傳詢如鮮壯丁應募則懇於剛毅各營內有情願出關者撥給數百人只須散勇不必派撥營哨各官以便毅齋拆補各營缺額也至張俊等應需經費已由公牘咨明

答李仲雲觀察

展來書得知體履安和至慰遠念七郎入塾聰穎可知惟課程無

書牘卷十七

七

取太密每日兩時讀書餘均聽其游息但勿離塾卽可涵養性靈不必加以峻督也黼堂蘭徵尙猶有待遲速蓋有一定春蘭秋桂必待其時耳湘中歲歉穀賤明歲青黃不接時殊爲可慮平價減糶恐不可不預謀想仁心慈德早已計及西事頗有轉機準部連克數城本擬進規南疆回部見屆大雪封山期內不能不按兵以待明歲春融當整旆急進也衰軀臨邊未免日暮途長之嘆然受恩過重亦惟盡瘁以仕己耳寬勛同輩學業鮮進望其爲鄉里長者少子弟之過足慙鄙懷屢屬其時親教益幸勿以不足教而棄之

答楊石泉

薌泉才氣無雙弟自奉 命撫浙卽奏調赴浙自後聲績日隆又
奏請入粵其撫粵時治具畢張於禁賭捕盜等事尤著成效不獨
粵人頌之卽島族亦懾服聲威嘖嘖稱道固天下所共知也此次
奉 特詔起用未及 簡畀遽以疾殞時論惜之粵人誦言其在
粵西功烈 朝旨開復原官飾終典禮不替有加閣下又以浙人
之請專祠奉祀薌泉有知亦可無憾矣至易名之典原出 特旨
內而侍郎外而撫部非例所應得除奉 旨予諡外間有中外臣
工奏請者則必因其美節懿行有出於事爲之外爲人所鮮知者
表而出之足以風示末俗俾有所觀感君子表微蓋取諸此也聞
撫徐清惠陝撫蔣文恪弟曾舉其清苦之况籲懇 恩哀得蒙

書牘卷十七

美

俞允而隴事危迫之秋周閣學以存亡呼吸之間繾綣相從籌畫
兵食調和驕將悍卒收復列城盡瘁以死弟雖縷舉實行上達
宸聰而易名之典終未之及薌泉豐功偉伐載在旂常 朝廷特
旨起用不幸齋志以沒宜天下所同悲而身後頌其功烈思其遺
愛者皆出自舊部士君子之口益足徵信無疑事功著於宇宙非
微也奚待於表哉以尋常言之則撫部例不得諡復官尙是身後
殊恩茲請 賜諡於義尅合已於浙人呈中批示之如浙人懷其
舊德則有位於朝者夥矣聯銜呈請誰曰不宜近有劉霞仙請諡
之案亦未及奏請蓋在官言官祇合如此閣下當以爲然

答劉毅齋

尊意以吐魯番托克遜爲都統轄地進兵南路須與和甫所部偕行以收師克在和之效用心周至可謂善處功名之際者惟和甫新受伊犁將軍 恩命又承世職雙眼花翎 懋賞感荷鴻施自深慶幸烏魯木齊都統 諭旨以英前督翰署理是吐魯番托克遜轄境已有專司之人和甫但嚴防烏垣紅廟昌吉呼圖壁各城堡要隘邊賊北竄將來南路肅清自可同膺 渥賞且弟因該軍

人數太短已奏請裁併二十營若如來牘調其英禮各營會剿則北路防營未免見單非所宜也竊揣尊意不過以前克烏垣各營入城先封賊糧金軍後到未及勻分和甫因此未免稍存芥蒂實則各營封存者不過百餘萬斤而後此搶割秋糧全是人力與金

書牘卷十七

三

軍固無預也弟以八萬兩賞各營亦以八萬兩解和甫軍營爲買糧之費差信準情酌理良厚不薄矣該軍本有專餉因無人肯應致積欠過多翻不如弟處挪濟之數已經據實陳明并代懇部款代催協款可謂不遺餘力若再爲剗肉醫瘡之計則肉已剗盡而瘡仍難補無奈之何只可悍然不顧聽其自爲而已牘稱率隊排搜山谷竊慮非此時所宜 進兵之先再辦爲宜 近時巴古中間搶劫肆出幸三起馬隊奪回不少徐萬福不顧大局可惡之至徐崑山高臥巴里坤所部廩集木壘河不復豫聞防運之事均嚴飭之金運昌全軍到甯夏過年大約到古城當在二月分紮各處及自抵烏垣當在三月麾下仲春師期宜改暮春語云擔遲不擔錯也

